

*Mihi Res, non Me Rebus.*




*Bibliotheca*

*M. Hyacinthi Theodori Baron,  
Antiqui Facultatis Medicinæ  
Parisiensis Decani, nec non  
Castrorum Regis et Exercituum  
Proto-medici.*



72035





OBSERVATIONS  
MEDICINALES  
ET CHIRVRGICALES,  
avec histoires, noms, pays, fai-  
sons & tesmoignages.

PAR

M. G. LOYSEAU Medecin &  
Chirurgien Ordinaire du Roy.

RIEN SANS LABEVRE



72,035

A BORDEAUX,

Par GILBERT VERNON.

M.DC.XVII.

---

Avec Priuilege du Roy.

OBSTETRIC

# MEDICINE

THE

AMERICAN

PHYSICIAN

AND

OBSTETRICAL

DICTIONARY

BY

JOHN

W. BOWEN

M.D.

OF

NEW YORK

1854

NEW YORK

W. BOWEN

M.D.

OF

NEW YORK



# AV ROY



IRE  
Trante ans font  
passez que le feu  
Roy HENRY  
le grand, vostre

pere (d'heureuse memoire) e-  
stant lors seulement Roy de  
Nauarre , & Gouverneur de  
Guyenne, cōme premier Prince  
du sang , voyant les heureux  
succes des cures par moy faic-



# AVROY

res , es personnes de plusieurs Seigneurs de sa Cour & autres, par l'art de la Chirurgie, (de laquelle i'ay tousiours fai& profession avec la Medecine,) m'e fit l'honneur de se vouloir servir de moy, & m'ayant appellé me fit coucher sur l'Estat au nōbre de ses Chirurgiens ordinaires: lobeissance que naturellement ie luy deuois, ioint l'affection particuliere que sa Majesté me tesmoigna en cela ( comme auparavant il auoit fai& en autres choses) me firent volontiers reietter toutes considerations de guain & vtilité, que ie pouuois faire dans la Guyēne& ailleurs, ou i'estois ordinairement appelle

le

# AVROY

lé, & employé pour me deuouer  
entierement à sa Majesté, &  
le seruant le suiure par tout le  
Royaume, ce que ie fis iusqu'a  
son aduenemēt a la Courōne &  
despuis ēcore iusqu'a ma foible  
vieillesse nepouuāt suporter les  
lōs & penibles voyages qu'il me  
cōuenoit faire tous les ās pour  
me rādre aupres de sa M. a mō  
instante & tres humble priere,  
me fit la faueur de m'en dispen-  
ser pour l'aduenir, voulant ne-  
antmoins que ie demeurasse  
tousiours du nōbre de ses Chi-  
rurgiens. Pendant ce temps de  
mon seruice, estant au voyage  
de la Franche Conté sa Majesté  
se trouuant mal, d'vne difficulté  
d'vrine, me fist l'honneur de



m'appeller seul, & me communiquer sa maladie l'ayant fondé ie recognus qu'il auoit vne carnosité au meat vrinal pres des parastates, de laquelle ( par son commandement ) ie le traittay à Monseaux au moys de Iuillet de lan 1598. & moyennant la faueur, & assistance de Dieu l'en gueris entierement. C'est vne des principales & plus excellentes cures que i'aye mis dans mes observations Chirurgicales dignes de remarque & de memoire, tant pour la difficulté dicelle, que pour la personne en laquelle elle a esté faite, asçauoir le premier Monarque du monde. Ces Observations

ons SIRE sont les fruiçts les plus precieux & salutaires, que j'ay peu recueillir dans les chāps spacieux d'Apollon avec plusieurs remedes de singulieres vertus par moy inuentés & cōposez, que ie reseruois pour memoire & particulièrement pour l'instruction & commodité de feu maistre Pierre Loiseau mon fils nagueres decedé, lequel suruiuant estoit (graces à Dieu) tellement versé en la Medecine & Chirurgie, que desia il practiquoit l'vn & l'autre, fort heureusement & au cōtētemant & soulagemēt de ceux qui l'ēplo-  
yoient en leur maladie, qui mesme a eu l'honneur d'auoir seruy

le feu Roy vostre pere en sa maladie des gouttes en mon ebsēce, & seruant pour moy, dont ie receuois vne ioye si extreme en mon cœur, & vn si grand contentement en mon ame, que ie n'estimois felicité pareille à la mienne, croyant en sa persōne pouuoir reuiure apres ma mort. Mais ayāt pleu à Dieu de l'appeller a soy, iay esté priué de mes esperēces. Parquoy, vaincu par les prieres de plusieurs notables personnes de mes amis, & porté de desir de seruir & proffiter au public, iay enfin prins résolutiō de me desaisir de ces mienes obseruatīōs les exposer au iour, & les mettre en lumiere, ce que iay prins:

# AVROY

la hardiesse de faire SIRE, sous  
le favorable auspice du nom  
tres auguste de vostre Majesté,  
alaquelle ie les dedie & consa-  
cre pour tesmoignage de la fi-  
delité & tres hūble obeissance q̃  
ie vous doibs. N'ayant riē de fi-  
cher (apres la gloire de Dieu)  
que d'estre tenu de vous cōme  
ie veux tousiours paroistre.

SIRE, priant Dieu vous  
combler de ses sainctes bene-  
dictions, affermir vostre Tro-  
ne & vous faire regner longue-  
ment & heureusement.

*Vostre tres humble tres fidelle,  
& tres obeissant Serviteur &  
subiect.*

G. LOTS EAV.



# AVX LECTEURS



*Out ainsi qu'un bon pere de famille qui à regne long temps & par son labeur acquis des biens & richesses, desire (auant mourir) les distribuer a ses enfans affin qu'il ne les laisse necessiteus. De mesme s'il a des choses rares ou secrets & quelque art ou sciēce, il ne les doit enseuelir avec soy, ains les laisser à ses enfans, principalement a ceux qui sont trouuez capables enclins, ou a ce destinez de nature, a cause dequoy i'auois deliberé de  
laisser*

laisser a mon fils aisné (desia bien  
 versé en la Medecine & Chirur-  
 gie, ) mes Observations & secrets  
 par moy long temps y a practiqués  
 & la plus part inuentez : mais  
 à presant puis qu'il à pleu à Dieu  
 me priver de mon fils aisné, (le quel  
 i'auois offert au feu Roy, ) qui luy  
 faisoit c'est honneur de le voir de  
 bon œil, & auoir son service fort  
 agreable, ie les ay voulu mettre  
 en euidence chascune par ordre cõ-  
 mençant par celle du feu Roy cõme  
 la plus digne, affin de donner cou-  
 rage, & hardiesse aux nouveaux  
 Chirurgiens, & les inciter à m'i-  
 miter ou faire mieux s'ils peuuent:  
 & d'autant qu'il y en a plusieurs  
 qui ne sont point versez en la lã-

## AUX LECTEURS

gue latine, ie les ay voulu ecrire  
en François, afin qu'ils les puis-  
sent non seulement lire mais enten-  
dre pour les ensuiure & practi-  
quer, les exortant toutesfois de  
n'estre entrepreneurs temeraires  
sans raison ny methode, & princi-  
palement ceux qui ignorent L'ana-  
thomie, & cōstruction du corps hu-  
main, sans scauoir deffinir, distin-  
guer ou separer les parties simples  
& similaires d'avec les organiques,  
ce sont ceux la que le bon homme  
Guidon (excellant Medecin &  
Chirurgien) compare à un aueugle  
qui veut trancher un bois, qui ne  
sait sil en coupe trop ou trop peu:  
ceux la donc ne doibuent estre mis  
au rang des Medecins, & Chirur-  
giens

## AUX LECTEURS

giens rationels, & methodiques: parquoy n'ayant la capacité requi-  
se faut qu'ils ensuiuēt le dire d'A-  
uicene qui nous baille ce precepte,  
fac cū cōsilio & non poenitebit.  
Ie nay rien prins ny enprūpté dail-  
leurs, car il y a bon tesmoignage de  
tout ce que iay escrit tant du feu  
Roy, Princes, & grāds Seigneurs  
de ce Royaume que plusieurs au-  
tres qui sont encore viuants qui  
me pourroiet desmētir si i'escriuois  
choses fauces, ou que d'autres ay-  
ēt faiēt ou escrit, ne douttāt point  
toutesfois qu'il ne puisse auoir esté  
faiēt des cures conformes aux mi-  
enes contenues en mes Obseruatōs.  
lesquelles ie vous baille pour estre  
toutes tres veritables, & vous



## AVX LECTEURS

supplie les recepuoir d'aussi fraîche  
volonté qu'on doibt faire à l'édroit  
de ceux qui s'estudient & employ-  
ent au bien public: que si i'apprens  
qu'elles vous soient agreables, ce-  
la maugmentera le desir de vous  
donner si apres mes remedes medi-  
cinaux, & Chirurgicaux, que i'ay  
la plus part inuētés & partie prins  
& tirés des plus excellēs auteurs  
tāt anciens que modernes, lesquels  
remedes i'ay souuant practiqués,  
mis en. usage, & trouué très ve-  
ritable, avec heureux succes. Je prie  
Dieu qu'il les benie, lors que les  
mettrés en usage. A Dieu.

SOM-



## SOMMAIRE DV CON- TENV EN CE LIVRE

<b>C</b> uration d'une carno- sité au meat vrinal pres des parastates, en la person- ne du Roy HENRY qua- triesme Roy de France, & de Nauarre. folio	I
Curation d'une autre car- nosité.	9
D'une pierre extraitte.	II
Pierres extraittes a plusi- eurs sans incision.	14
D'un ver trouué dans la teste.	16
D'un coup de lance au van- tre blessant les intestins.	17

Playe dans la poictrine & poulmon.	25
Substance du cerueau perdue.	30
Vne mesme chose aduint.	31
La tranchée artere blessée.	32
Oesophague blessé.	32
Hidropisie guerrie.	35
Hernie vmbiliquale.	35
Hidrofarcocele guery.	36
Verrues dans la vulue.	37
Arteres coupées guerries.	37
Thumeur au milieu du front extirpée,	38
Apostume au foye,	39
Tout l'os humerus extirpé.	40
Perles trouuées dans la vessie d'un bœuf.	42
Pierre dans la vessie du fiel	43
Aureil-	

Aureilles, & doigts gangrenez de froit. 43

Ophthalmie guerrie par incision. 44

Empiemes gueris par incision. 45

Proptosis, idest procidentia oculi. 46

Pterigion venant d'un vngula à l'œil. 47

Playe transperçant le pied tost guerrie. 48

Arquebusade entre les deux yeux. 49

Playe d'un gros intestin, 50

Figure de la playe de l'intestin. 52

Autre playe à l'intestin. 53

Pepins de raisin sortis par

vn absces a laigne.	54
Playe de la vessie guerrie.	54
Maniaque guerrie.	55
Petites glandules fort douloureuses,	56
Gangrene à cause d'une incision.	58
Ulcere de verole guery.	59
Crane carié par verole.	60
Doleur hemicranée guerrie.	61
Testudo atheromateux.	62
Extraction de l'os femur.	64
Polipe guery.	66
Autre polipe guery.	67
Gangrene à l'escrotum, verge & ventre inferieur.	68
Autre.	70
Rancontre de Monsieur de Bouillon.	71
Hidrop-	

Hydropisie pectorale.	74
Poulmō adherāt aux costes.	75
Fracture des deux parietaux par contusion.	76
Phrenesie apres l'accouche- ment.	78
Glandes serophuleuses sur l'esternum.	78
Tumeur à lorifice de lestomach.	80
Apostume dans le corps sans apparence guery.	81
Mesme mal a Monsieur de Maugesy fils de Monsieur de la Force.	83
D'un enfant nay sans cul.	85
D'un coup de poignard dās la poictrine.	86
Tumeur à l'anūs ou podex.	86

D'une contusion sur la teste avec Epilepsie	88
Arquebusade à l'Ischion.	89
Vlcere au palais guerrie.	93
Vne fille née sans vulue.	96
D'une tumeur cancruse.	96
Verrue guerrie sans incision.	98
Iliaque passion.	99
Phrenesie, douleur de vêtre à cause des vers.	100
Hæmorrhagie par vn pore du cuir sans playe.	102
Homme ne pissant point.	103
Vne tumeur de la grosseur d'une grosse figue dans la bouche.	104
Vlcere sinueux à la cuisse a- vec hemorrhagie,	106
Vn corps mort etique, & la cause	

cause. 108

La gangrene commençant  
par les doigts du pied. 111

L'œil percé d'un couteau  
guery. 112

Chalazium ou grandio qui  
viêt aux palpebres des yeux 112

Vomissement des petis en-  
fans. 115

L'vrine reiectée par le dos. 116

Vlcere au mēton guerie par  
larrachement d'une dent. 117

Artere coupé, l'hemorragie  
guerie par ligature. 118

Pluresie purgée p les vrines. 120

Difficulté de respirer cause  
la mort 120

Tumeur suppurée par le  
seul Teriaque. 121



Cheute a la renuerse cause diabete  
abeste qui est fleur d'vrine. 121

Vomissement noir comme  
ancre. 122

Par l'odeur d'un medica-  
ment estre purgé. 123

Vn monstre né 123

Sang tiré du bras, fætide. 124

Difficulré d'vrine. 124

D'une estocade d'espée aude-  
sous du muscle de l'hoide mō-  
tant le long du bras en-  
trant dans la poitrine. 128

Extrait

*Extraict du Priuilege du Roy.*

**P** Ar grace & priuilege du Roy, il est permis a **GILBERT VERN O Y**, Marchant Libraire & Imprimeur de la ville de Bourdeaux, d'Imprimer ou faire Imprimer tant de fois & en tel volume & charractere qu'il verra bon estre, vn liure intitulé, **OBSERVATIONS MEDICINALES & CHIRVRGICALES**, avec Histoires, pays, noms faiso's & tesmoignages. Et vn Traicté de **INTER-NOR. & EXTERNOR. MORBORVM, CV-RAT**. Par **M. G. LOYSEAV**, Medecin & Chirurgien Ordinaire du Roy, pour le temps & espace de six ans entiers à compter du iour que lesdicts liures serót acheués d'Imprimer, & faict defences ledict Seigneur à tous Libraires & Imprimeurs de ce Royaume, & tous autres estrâgers traffiquâs en iceluy pays, & terre de son obeissance & seigneurie & à toutes autres personnes quelcōques de les Imprimer, ou faire imprimer, vendre, ny debiter, contrefaire, ny alterer, en quelque maniere que ce soit, & de n'en vendre d'autre impression que de ceux dudit **VERNOY**, à peine d'amende arbitraire & confiscatiō des exemplaires, & de tous despens dommages & interests dudit **VERNOY**: outre veut ledict Seigneur, que mettant l'Extraict dudit Priuilege au commencement ou à la fin de chascun desdicts exemplaires, que cela ait

forme de signification, tout ainsi que si l'original  
auoit particulierement esté monstré à vn chascun,  
comme il est plus emplement déclaré par ses let-  
tres patentes, données à Paris le 21. iour de No-  
uembre, 1616. Sellées du grand seel de la Chan-  
celerie, & signées.

*Par le Roy en son Conseil*

RENOVARD



OBSER-



# OBSERVATIONS MEDICINALES ET Chirurgicales, avec Histoires, noms, pays, saisons & tesmoi- gnages.

*Curation d'une carnosité au me-  
at urinal pres des parastates, en  
la personne du Roy HENRY  
quatriesme Roy de France, & de  
Navarre.*



An mil cinq cēs  
nonante hui&,   
s ruât mon quar-  
tier au voyage de  
la Frâche Conté.

Le Roy HENRY quatriesme,

estoit tellement travaillé d'une difficulté d'urine, à cause d'une carnosité de long temps engendrée d'une gonorrhée, qu'en marchant il me falloit souuēt mettre pied à terre, pour le faire uriner par le moyen d'une bougie, & le plus souuāt par une sonde ou canulé d'argent, tellement qu'un iour ie luy trouuay la verge enflée, froide, mollasse, & insensible dont ie fus en crainte d'une mortification ce qui fut euité par le regime de viure, legere purgation & fomentation. Et voyāt que le Roy sen faschoit & sestonnoit, de quoy il tarδοit tant à guerir, ie luy demanday combien il y auoit du cōmancement

cemēt de son mal, lequel me dit  
qu'il y auoit sept ou huit ans, a-  
lors ie luy dy, que ce n'estoit pas  
mal qui ne se peut guerir, sur ce  
sa Majesté me demanda si ie le  
pourrois guerir ie repondis q'ie  
le gueriroy avec layde de Dieu  
au moys de Septembre pourueu  
qu'il fut obeïssant, qui soudai me  
promit de faire tout ce q'ie vou-  
droys & il me cōmāda me tenir  
prestaudit tēps, auquel il me mā-  
deroit, mais il luy fust impossi-  
ble tant attendre. car le 20. & 25.  
de Iuin 1598. ie receux deux  
de ses lettres accompagnées de  
celles de Monsieur de la Ri-  
uiere, Conseiller du Roy, &  
son premier Medecin par la

poste de Bourdeaux, la i. desquel-  
les estoit la teneur que sensuit.

*Loyseau ie vous fay ce mot  
pour vous dire, que vous ne fas-  
sies faute de vous rendre aupres  
de moy au temps que vous mande  
Monsieur de la Riviere d'autant que  
iauray besoin en ce tēps la de vostre  
service, m'assurant que n'y ferez  
faulx prieray Dieu, Loyseau qu'il  
vous aye en sa garde.*

L'autre estoit de mesme sens  
& Monsieur de la Riviere par ses  
lettres accompaigna tousiours  
celles du Roy & mescriuoit tel-  
les parolles.

*Monsieur Loyseau ne faictes fau-  
te vous redre icy a la fin de l'un,  
d'autant qu'il est besoin de commā-  
ser*

*cer la cure , de la maladie du Roy, lequel ma commandé vous escrire expres de venir n'ayāt loisir d'attādre au moys de Septembre, d'autāt que le mal le presse, noubliés riē de ce que cognoistrés estre propre pour la carnosité & songez à luy demander quelque chose car il la vous donnera.*

Je ne fis faute me rāndre pres de sa Majesté a mesme temps que Monsieur de la Riviere m'auoit mandé avec vne pouldre que i'auoy composée a Bergerac , en semble vn instrument, que j'inuentay faiēt en forme de canule, pour seruir de sōde & pour porter le medicament, sur la carnosité lequel instrument Monsieur



de la R. iuiere approuua grandement & mesme ma poudre disant qu'il ny en auoit point de plus propre avec lesquels remedie consumay ladite carnosité dans dix ou douze iours, & l'ulcere fut cicatrizedans trois semaines apres, i'auois composé vn vnguent de ma pouldre incorporée avec beurre frais, lequel ie portois avec ma canule sur la carnosité le soir à l'entrée du liect, ayant premierement fait pisser le Roy, & le lendemain i'v-  
sois diniections refrigerantes, faites quelque fois, avec les trociques de gordō & quelques fois avec les trociques blācs, de rhasis disso' avec les eaux de Plātaī, pourpier ou de solanū, selō lexi-

gence du mal , & pour la fin la  
ruthie preparée, antimoine pre-  
paré incorporez avec beurre  
frais , ou avec longuent pôm-  
pholigos & album rhasis , por-  
tés avec ma canule, ou vne bou-  
gie, le bout de laquelle iemu-  
nissois d'un emplastre fait avec  
ma pouldre ; laquelle ie laissois  
dedans le soir le Roy estant au  
liet , ou bien au lieu dudit vn-  
guent ; iay acoustumé de laisser  
dans la verge vne sonde de plôb  
oincte dudit vnguent, ou bien  
frotée d'argent vif cru & purifié.  
Et dâs cinq semaines le feu Roy  
fust entierement guery par la  
grace de Dieu. Combien que  
durant ce temps la mes ennemis

ou enuieux, me voulurent calomnier, à cause de quelque accident qui luy suruint, non pas à cause de sa carnosité, ny des remedes, mais à cause de quelque excès que la Majesté auoit fait, tellement que sans vn vomissemēt qui luy suruint proprement par deux fois il eust este fort mal, dequoy il eust la fiebvre trois ou quatre iours & lors mes enuieux faisoient courir le bruit (iusques dans Paris,) que i'estoi cause du mal du Roy, par mes remedes & instrumēs, mais le Roy assure de ma fidelité, & recognoissant bien que cela venoit d'ailleurs, me fit la faueur de parler pour moy, & me iustifia  
en la

en la presance de Monsieur le Duc de Bouillon & plusieurs autres, & nomma les principaux de mes enuieux qui estoient ialous dequoy la Majesté ne vouloit permettre qu'ils fussent presans lors que ie le traitoy, mesmes de puis la majesté estât à S. Germain, fist vn grand affrôt à l'vn d'eux, luy disant vous estes bien marry que ie sois guery par autre main que par la vostre, mais ie sçay bien de qui ie me fie. Et dâs quelques iours apres ie men reuins à ma maison, avec la bonne grace du Roy, & moy aussi bien content.

*Curation d'une autre carnosité.*

*L'an 1599. en May, Monsieur*

*A 5*

de la Riviere, Cōseiller du Roy,  
& son premier Medecin, men-  
uoya à Bergerac, vn honneste  
homme de saint Iehan de Lus,  
avec vne sienne lettre, nommé  
Mōsieur Chiuau riche marchāt,  
ayant deux nauires sur mer, le-  
quel ledit s<sup>r</sup> de la Riviere, auoit  
d'autresfois traité à Bayonne,  
d'une carnosité, luy donnant par  
foys allegement, & non pas gue-  
rison, parquoy lassurant que ie  
le guerirois comme i'auois au-  
parauant guery le Roy, de mes-  
me maladie, ledit sieur de la Ri-  
uiere me coniueroit par sa lettre,  
de faire tout ce que ie pourrois  
pour l'amour de luy, & l'ayant  
fondé ie luy trouuay vne carno-

sité

fité fort calleuse, bien pres des parastates qui bouchoit le canal ou meat vrial, tellement qu'en lemissiõ il auoit de grâdes douleurs, & efforts avec peu deffect. Dieu me fit la grace, que dans cinq semaines il fust entieremēt guery, l'ulcere cicatrisé, pūssant largement & sans douleur. Depuis i'en ay guery vn Gentilhōme de la chambre du Roy, vn autre à Bourdeaux, & vn pres de Saintefoy & plusieurs autres.

*D'vne pierre extraitte.*

Lannée 1600. au mois de Iuin men allant trouver le Roy, pour seruir mō quartier, ie trouuay à mon logis à Limoges, vn marchand d'Orleans nommé

Monsieur Potier, lequel ce mesme soir me communiqua vne infirmité qu'il auoit, c'est qu'il ne pilloit iamais qu'il n'eust premierement repoussé vn calcul qu'il auoit au col de la vessie, avec vne canule d'argēt, lequel ce mesme soir ie sonday, & rencontray la pierre & d'autant que ie n'auois loisir d'attendre, ie luy dis que sil vouloit me venir trouuer à Paris, que ie le traitteroys la, ce q ne fut possible à luy ny a moy, d'autant qu'il fallut que i'alasse trouuer le Roy à Fontainebleau, ou ie demeuray seruuant mon quartier, mais au retour ayāt acheué mon quartier, ie passay a Orleans, & d'autant qu'il

qu'il venoit souuant à Bergerac, leuer des depies, ie luy dis que sil me vouloit venir trouuer à ma mai<sup>son</sup>, ie le tirerois de c'este peyne, ce qu'il fist & trois ou quatre iours apres que ie fus arriué à ma maison, il me vint trouuer, & l'ayant mené en mō cabinet, ie luy sonday & rencontray le calcul. Ie luy dis que sil vouloit auoir patience, ie le luy tirerois, quoy qu'il ny eust personne que luy & moy. luy donc estant resolu, ie le couche sur vn banc sans l'atacher, & tenant pres du perinée le calcul, entre les doits pollex, & index de la main senestre, ie luy mets dans la verge vne sōde vn peu crochue avec laquelle ie tenois ferme, &



accrochois le calcul comprimant par le dehors, & compellant ou contraignant avec les deux doigts pouce & indice, que ie le ramennay à l'extremité de la verge, dans le glâd duquel en fin ie l'expellay & tiray sans incision, estant de la grosseur, & ongueur d'une petite olive. Et d'autant que en ceste partie ne se peut faire telle violence sans quelque excoꝛiatiõ i'vſay interieuremẽt & exterieuremẽt, de remedes anodins, refrigerans, desſechans, & dans huit ou dix iours fust guery, monta à cheual & ſen alla à Orlẽans, luy content de moy, & moy de luy.

*Pierres extraittes a plusieurs sans incision.*

Vn moine des augustins (moy-  
 alors residant à Toloz<sup>e</sup>) me mā-  
 da l'aller voir dans le conuent, le-  
 quel ie trouuay en grand peine,  
 & douleur, ne pouuant pisser; à  
 cause d'un calcul qu'il auoit aux  
 parastates, bouchant entierement  
 la voye de l'vrine. Alors tenant  
 presté ledit calcul, avec les doigts  
 enuiron le perinée, luy mis vne  
 sonde dans la verge estant vn peu  
 crochue, ayāt vn bouton au bout,  
 avec laquelle ie brizoy la pierre  
 en plusieurs pieces, lesquelles ie  
 tiray l'vne apres l'autre sans inci-  
 sion, tellement que les pieces re-  
 ioïtes mōstroïēt estre de la gros-  
 seur d'vne nois, il m'en monstra  
 plus de cinquante dās vne boitte

la plus part grosses cōme de grosses febues, ien ay tiré plusieurs a des enfans de dixhuict a vingt moys sans incision.

*D'un ver trouué dans la teste.*

Maistre Claude du port Chirurgiẽ demeurāt à Chābery, ville capitale de Sauoye, ma raconté qu'il a ouuert le crane d'vne fille morte, laquelle en sa maladie souuant tomboit en manie, & quelquefois en epilepsie, & luy trouua vn grand, ver encore vivant, lequel auoit rongé le crane, pour suser du sang des veines capillaires du diploẽ pour se nourrir.

*D'un coup de lance au ventre  
blessant les intestins.*

Ala

A la bataille de courtras , l'an  
15 8 7 20. Octobre, fust bleffé  
Mōſieur de Vivās, de deux coups  
de lance l'vne playe eſtoit au bras  
droit, perſant le muſcle biceps,  
enſemble le muſcle brachicus, ra-  
flant cōtre le perioſte de l'hume-  
rus, & paſſant outre le boys rom-  
pit, & le fer demeura dans le bras  
lequel iarrachay.

Plus vne autre playe au deſſus  
du pubis au deſaut de la cuiraffe,  
montant en haut vers le ventri-  
cule, duquel coup il fust renuerſé  
ſur la croupe de ſon cheval, dont  
le chevalier alloit d'une ſi grande  
roideur , que le bois de la lance  
rompit , & le fer demeura bien  
auant dans le vētre. Et quoy que

ledit sieur de Viuant eust esté  
bleffé plusieurs fois de tres gran-  
des playes, dit nauoir iamais sou-  
fert vne si extreme & violante,  
douleur qu'alors, & d'autât que  
en mesme temps, le mesme iour  
auparauant, on luy auoit donné  
vn autre coup de lance pardeuât  
au milieu de sa cuirasse, dont le  
bois rompit, & le fer luy tomba  
dâns la seie entre ses cuisses, & tō-  
bâ à terre lors qu'ô le descendoit  
de cheval, qui fut cause qu'on  
croyoit que ce fut le fer qui l'a-  
uoit bleffé au ventre, mesmement  
ceux qui le pensoient qui estoient  
Messieur le Gêdre, & Martel, tous  
deux Chirurgiens du Roy, telle-  
ment que mesprisant le coup, ils

Iuy mirent vne petite tente comme vn fer deguilliette , pendant en bas vers le pubis , iestoys en perigort , la ou ie fus mandé en diligence, & arriuy à Sainctefoy le troiesme iour la ou estoit le blessé, & trouuay qu'on acheuoit de penser le ventre, & adioustant foy a ce que lesdits Chirurgiens me dirent, & que son grand coup estoit au bras (ce que ie nestimay pas beaucoup estant loing de l'article sans fracture quelcōque. (Ie ne le sonday pas mais mō dit sieur de Viuants se fiant fort de moy, comme l'ayant traité souuant de plusieurs autres grandes playes, me pria de coucher en sa chābre, a quoy iobeys volontiers, les au-

tres se retirèrent , pour penser grand nombre de bleſſez, qu'il y auoit en la ville , & moy voyant que noſtre pauvre malade auoit de grandes douleurs, & tranchées au ventre faiſant force ſang par le dos, & qu'a tout propos luy falloit bailler le bourrelet ie iug ay que les inteſtins , ou quelcun d'iceux eſtoiēt bleſſés. Et d'autant q̃ les douleurs cōtinuoiēt ie fus cōtraint le deſcouvrir pour le pēſer, & mieux ſonder ce que ie fis auāt minuiēt , & cognoiſſant que la trace de la lance nalloit point en bas, & voyant que le ventre cōmançoit à eſtre liuide, ie ſonde en haut , & trouue à demy pied de l'orifice quelque choſe eſtrange

& dur qui fust cause , que ie fis  
vne incision de quatre doigts , &  
me contentay de cela pour lors  
avec esperence que ce seroit le  
moyen de trouuer , & extraire la  
chose estrange. Mais dautant que  
les douleurs augmētoient de plus  
en plus , considerant aussi les de-  
jections sanglantes ie me delibe-  
re encore de le repenser tellemēt  
que par lincision que iauois faicte  
ie rencontre deux esclats de bois,  
chascun de la longueur du doit,  
le iour estant venu , mes compa-  
gnōs vindrent croyant que nous  
le panserions ensemble , mais ie  
leur dy qu'il n'estoit besoī d'autāt  
que ie lauois pensē deux fois ce-  
ste nuit , & que ie venois de luy



tirer deux esclats de bois par vne incision que ie luy auoy faicte; & parce que la playe estoit encore sanglante, qu'il falloit attendre à le pancer sur le soir, chascun s'employa tout le long du iour, à panser nombre infini de blésiez, & le soir venu dautant que les douleurs le pressoiēt, & que mes compagnons ne venoiēt point, ie le descouure, & par l'immisiō ie fōde & trouue vne chose dure, ronde, & lisse, qui estoit le fer de la lance, lequel ne pouuant bien prendre i'ampliffie encore la playe, & par icelle au lieu du ferrement i'y mis la main, & tiray ledit fer, & comme iacheuoy de le penser le Roy enuoya deux.

Gentil-hommes pour ſçauoir ſi  
portemant, moy ne pouuant al-  
ler rapporter la faict a ſa Majesté,  
ie luy enuoyay ledit ſer par ces  
Gentil-hommes, dequoy le Roy  
fort eſbahy, & admirant ceste  
œuure, appelle ſes autres Chirur-  
giens qui lauoient veu au cōman-  
cemẽt, les blaſma & tança fort  
à cauſe qu'ils luy auoient rapporté  
que le grand mal eſtoit au bras, &  
que la playe du ventre neſtoit riẽ.  
le lendemain le Roy le vint voir  
moy eſtant par ville, pour voir  
d'autres bleſſés, & luy venoit on  
de donner vn bouillon apres vn  
clyſtere qu'il auoit prins au para-  
uant, dont partie du clyſtere, &  
le bouillon fortirent par la playe

tellement que le Roy, le trouuāt en si mauuais estat demāda la ou i'estois, dequoy aduertty ie vins promptement, & trouuay le Roy qui descendoit du degré, qui me commanda de monter voir ledit sieur de Viuās: ce que ie fis en diligence, & y trouuay Martel qui tenoit la main sur la playe. Alors le pauvre Seigneur se reclama à moy, me disant qu'il estoit mort, mais ie le consolay, & assurey en tout ce qui me fust possible, & layant descouuert, ie trouuay que cela estoit veritable, & mesme vn autre clistere, qui passa partie de mesme. Ie mē vays (apres la- uoir pansé) ches vn Apoticaire Allemant nommé Phlug, La ou ie luy

Je luy composay vn baume duquel ie luy rēplissois sa playe soir & matin. Je luy deffendis le boire & toute viande solide, luy faisant prendre seulement vn hordeat le matin, & vn autre le soir. Je luy faisois prendre soir & matin des potiōs vulneraires. Et Dieu benit tellement c'est œuvre, qu'au seiziesme ou dixseptiesme ie ny mis qu'un emplastre solide vulnereaire, & ledit sieur de Viuans monta a cheual, & vint coucher à Saint Sernin, chez vn sien parent estāt parfaictement guery.

*Playe dans la poëtrine &  
poulmon.*

**D**Eux ou trois ans apres, il y eust vn fils de la maison de

Goneau qui est au deffous du chasteau dela Force, luy & vn siē valet sen vōt de nuit ie ne sçay pourquoy faire, il trouuēt récōtre auquel ledit fils de Goneau fut tué & le valet nommé Tabary fort blessé d'vne estocade dans la poitrine au deffous du tetin droit, trāspersant le muscle pectoral, entrant entre la troisiēme & quatriēme coste ; dont en retirant lespée la playe se fit fort grande, par laquelle le x remité du lobe du poulmon par son continuel mouuement vint à sortir, & soudain se tumeffia, & s'altera sans estre remis au dedans, & d'autāt que ie le vis seulement au troisiēme ou quatriēme iour, ie trouuay

uay ceste partie du poulmon alterée de lair , flectrie & dessechée, comme le poulmon d'un cheureau qui à demeuré deux iours pendu a la boucherie , lors ie le couure sans le panser , & men vay faire le pronostic à ceux de la maison, & leur dis que ie croyois qu'il en mourroit, d'autant que le poulmon est vne partie noble servant pour ventiller le cœur, qui est le principe de vie, la fontaine & origine de la chaleur naturelle, le domicile de la faculté vitale , & que l'extremité dudit poulmon estoit alteré & corrompu, & que l'art commande d'oster ce qui est estrange à nature, si autrement ne se peut rectifier tout.

tesfois que telles playes sōt mortelles le plus souuant, alors ils me dirent qu'ils fasseroient de ma capacité, & me prient de faire ce que ie cognoistrois estre necessaire. Deslors ie vis que ce que les deux costes auoient tenu serré, auoit épesché l'alterature de l'air, ie coupe ce morceau, & le mets tramper dans de leau fresche & lauay la playe nouuelle de vin blanc tiede, & l'ayant essuié d'un linge deslié, i'y appliquay de mon Baume ( qui est excellent ) tiede avec vne plume de poulaille, & le remets dedans, & le pansois soir & matin luy lauant avec vne decoctiō vulneraire laquelle vuidee i'y mettois de mon Baume,

ie luy

ie luy faisois aussi vſer de potiōs vulneraires tous les matins, trois heures avant diſner, il vſoit de tiſane pour ſō boire fort raremēt, & des bordeats. Et pour retourner à mon propos, ie vous diray que le morceau de poulmon que i'auois mis tramper reuint en ſa couleur naturelle, tellement que ie ratiocinois que l'ayant remis ſans le couper, ſi l'humidité ſubſtantiffique ne l'eust pas ſi bien remis que leau freſche, ce pauvre bleſſé guerit outre mon eſperance, & voyant cela ie croyois que dās vn an il mourroit phtifique, mais il veſquit plus de dix ans faiſāt beſoigne groſſiere comme labourer, beſcher les vignes cou-



perdu bois , dequoy Monsieur  
& Madame de la Force, pouvoient  
rendre tesmoignage.

*Substance du cerueau perdue.*

**I**L y auoit en ceste ville de Ber-  
gerac vn peintre nommé Pineau  
lequel reçut vn grād coup des-  
pée sur la teste , par vn homme  
robuste nommé le grād Bandia,  
par laquelle playe perdist de la  
substance du cerueau, recogneue  
nompas le premier iour a cause  
du sang, mais le second , ce fust  
mon pere qui le pensoit, comme  
chose perdue , lequel toutesfois  
guerit , mais il demeura paraliti-  
que de la langue, & de la moytié  
du corps

du corps de la partie opposite  
tant qu'il vesquit.

*Vne mesme chose aduint.*

**D**Ans la ville de Bergerac vne  
petitte fille de laâge de 4. a  
cinq ans, estant assize en la rue,  
sa mere iouant aux quilles leue la  
boule si haut qu'elle va tomber  
sur la teste de la fille dont luy en-  
fonça l'os parietal du costé gau-  
che, avec grandes fissures, par  
lesquelles sortit a mesme instant  
de la substance du cerueau caillée  
comme fromage, de la grosseur  
d'une noisette, vesquit long tēps  
& eust trois maris, estoit fille d'une  
sœur du capitaine la Palanque.

*La trachée artère blessée*

**I**L y auoit vn Cadet de loub-  
 dat, lequel à vn cōbat reçeut  
 vne arquebuzade , qui luy brisa  
 deux anulaires de la trachée ar-  
 tère, qui est appellée organe de la  
 voix & de la respiration , faisant  
 sa voix par la, comme vn Oyson  
 a qui on à coupé la gorge, on le  
 porta chez vn Gentil-homme  
 nô mé Mōsieur de Pechaud, pres  
 de Belue la ou ie le traittay &  
 guerist parlant si bien que iamais.

*Oesophage blessé*

**A**Vpres de la maisō de masie-  
 Arc pres de Villereal, il y eust  
 trois

trois soldats venant du siege de la Rochelle, l'un deux estoit mieux vestu que les autres, auoit de bonnes armes, & argent dans la bourse, lequel fust allômé par ses deux compaignons qui croyant l'auoir tué, le despouillent & luy prennent tout ce qu'il auoit, & le jettent dans vn fossé sur des buissons ne parlant point. Monsieur de Masieres estant aduerty de cela & qu'il n'estoit du tout mort l'éuoya querir & le fit porter à vn village la ou ie l'alay voir, ie luy mis de leau dâs la bouche laquelle soudain sortit par la playe qui me fit croire que l'osôphague estoit percé ce que ie vis à l'œil, & touchay a la main. Il auoit vn

grand coup d'espée sur l'occiput, qui luy couppoit le crane comme vne escuelle a aureille lequel os ie separay, & ostay & remis la partie charneuse & l'attachay par des points desguille. Plus vn grand coup despee sur la ioue dextre, luy couppant tout los zygomata, lequel ie separay & ostay & remis & attachay le muscle par des points desguille en fin il fust guery, recouura la parole on l'apelloit le bon larron. Il desroba vne cauale pour courir & desrober en fin il fust tué.

*Hidropisie guerrie.*

**D**Ans la ville de Bergerac fut  
vne femme hydropicque,  
de laquelle le nōbril se tumeffia  
de telle façon, qu'il estoit lucide  
cōme verre lequel ie luy ouuris  
auec la lancette, dou il sortit plus  
de deux seaux deau, & guerit de  
son hidropisie.

*Hernie umbilicale*

**V**Ne fille de ma fille hydropic  
que ayāt le nōbril fort enflé  
& lucide, il persa de soy, dou il  
sortit matiere fecale, & trois ou  
quatre grands vers, & guerit de  
l'hydropisie l'vlcere du nombril  
se cicatriza, & vesquit trois ou  
quatre ans apres.

*Hidrosarcocèle guery.*

**M**onsieur du Queylō principal du college de Bergerac, aâgé de soixâre âs auoit vn Hydrosarcocèle, lequel ie luy gueris par la grace de Dieu, & premierement ie luy euacuay l'hydrocèle par vne ouuerture que ie luy fis avec vne lancette à lescrotum & leau estant euacuée ie recog-nus plus a plain le sarcocèle, & alors j'ampliffiay l'ouuerture & extirpay la carnosité, & apres cicatrisay l'ulcere, & la dessechay par vne diette de quinze iours.

*Verrues dans la vulue.*

**I'**Ay guery plusieurs femmes  
ayant le dedans de la vulue d'un  
costé & d'autre plain de verrues  
& a plusieurs hommes ayant le  
balanus & prepuce dedans &  
dehors plain de verrues dās vint  
& quatre heures, ou deux iours::  
par le moyen d'une pouldre que  
ie fay sans douleur & sans vlcere,  
ains tumbēt cōme galles seches.

*Arteres coupées gueries.*

**I'**Ay pensé plusieurs arteres, &  
veines coupées avec grād hæ-  
morrhagie ne la pouuant estan-  
cher par pouldres astringētes, ny  
cauteres, ce que iay faict aisemēt  
& seurement par la ligature mes-



mement au carpe , metacarpe, malleoles & autres en quel lieu qui soit.

*Tumeur au milieu du front  
extirpée.*

**F**Rançois de Beauregard hôte des trois connils à Bergerac, auoit en son front vne tumeur de la grosseur d'vne pomme , sans douleur , toutes fois cela luy ennuyoit l'ayant portée plus de quinze ans & croissoit tousiours, laquelle ie luy extirpay , & croyant que ce fust vn atherome ou steatome trouuay que ce n'estoit que gresse congelée.

*Apostu-*

*Apostume au foye*

**B**Errtād Aubier bourgeois & marchāt de la ville de Bergerac ayāt vne grāde douleur au dessoubs des costes partie dextre avec fiebure, ie le voulos voir, & trouuay qu'il sentoit grand douleur par lattouchement, ie re-  
recognus que c'estoit vn apostume au foye, & soudain ie luy tiray du sang de la veine basilicque dextre, ayant ouuert la veine soudain sortit le pus par la veine blanc cōme du lait, & eust quelque allegement, apres disner ie luy en tiray ēcore & fut du tout appaisé, ie temperay & rectiffiay son foye avec apōseme hepatic.

Au bout de deux ou trois ans  
mesme douleur luy revint, & fut  
guery par mesme remede.

*Tout los humerus extirpé*

**L**E Capitaine Mesnis estât au  
siège de Cōstācies pour Mō-  
sieur de Floirac , contre les gens  
de Monsieur de Limeil , reçut  
vne mousquetade au bras droit,  
chargé de neuf balles , qui luy  
brisarent tout l'humerus d'espuis  
lespaule iusques à l'article du cu-  
bitus a sainct Sibia sept lieues de  
Bergerac , & n'ayant la commo-  
dité de demeurer long temps en  
ce lieu là, a cause de la guerre, ie  
delibere de luy faire vne incision  
selon

ſelon la rectitude des fibres, depuis l'eſpaule iuſques au ply de l'artic'e & cōnexiō de l'humerus au cubitus, tellemēt que la veine mediane n'ē fuſt point exēpte laou y euſt grād hæmorrhagiemaïs i'auois preparé vn bon reſtrinctif par le moyē duquel bien toſt fut arreſté & demeuray deux fois vñt & quatre heures ſās le penſer, ayāt touſiours les cauterēs preſts ꝛ cas de neceſſité, touteſfois riē ne bougea, & ayant leué l'apareil ie luy ouuris ſō bras cōme vn liure & dās deux ou trois iours ie luy tiray tous ſes os briſez, tellement qu'au lieu qu'il falloir eſtre pluſieurs pour luy remuer ſon bras a cauſe des os qui le piquoyent

ie le mis debout son bras en escharpe, & le menay à Bergerac la ou ie le traittay, & guerit sans perdre aucune action du bras ny de la main, e criuant, mettant la main au poignard & au chapeau, & fit long temps la guerre sans autre accident que foiblesse.

*Perles trouuées dans la vessie  
d'un bœuf.*

**A**V Chasteau de la Baume, fust tué vn bœuf, dās la vessie duquel on trouua plus de 200 perles, la plus part grosses comme des pois lucides comme perles Orientales.

*Pierres dans la vessie du fiel.*

**F**Eu madame de Lauſū, iſſue de la maiſō de Brie, mourut, à vne maiſō de mōſieur de Lauſun qu'ō appelle Tombeboœuf, d'une plureſie , le corps de laquelle i'ouury après ſa mort, a laquelle ie touuay entre autre choſe dans la veſſie du fiel, vne pierre de la groſſeur d'une oliue eſtāt verte cōme vne emeraude.

*Aureilles, & doits gengrenez  
de froit.*

**A**V voyage de Lorraine il y euſt pluſieurs ſoldats, leſquels eſtāt mal chauffeſ & veſtus les aureilles, & doits des pieds leur tūberēt en gangrene, dont

ien gueris plusieurs que ie traittay.

*Ophthalmie guerie par incision.*

**V**Ne fille du bourg de cours pres du Chateau de Pilles ayāt supporté vne ophthalmie quelque temps , sen vint a moy , & ayant bien consideré son œil ie recognus le pus au trauers de la cor-  
née comme du lait dans vne fiole. Je donnay vn coup de lancette sur ledit lieu , dou i'eua-  
cuay le pus , aussi cuiët qu'il sçauroit estre a vng absces , & guerit sans deprauation ny diminution de la veue.

*Empiemes gueris par incision.*

**P**Lusieurs a qui la pluresie ne s'estoit biē purgée p̄ la bouche, sētāt̄s tousiours douleur au costé. Le leur ay faiēt ouuerture entre deux costes, au lieu de la douleur, la ou ie rancontrois soudain le pus, & font gueris du tout sans fistule. Et entre autres vn Gentil-homme d'vne lieue pres de Bergerac, nommé Mōsieur de Corbiac qui n'auoit pas quīze ans, lequel guerit, & vit encore ayāt plus de cinquāte ans, sans fistule quelconque. Plus vn fils de lāne Monet de Bergerac, & vne fille du Capataine la Boile, vn enfant pres Sainctefoy, &



plusieurs autres.

*Proptosis , idest procidentia  
occulj*

**I**L y eust vn Gentil-homme  
nōmé monsieur de Beler, le-  
quel fust tellement tourmenté  
d'une tous, qu'un œil luy sortit  
de l'orbit, dont l'inflammati-  
on & tumeur furent si grandes  
que maistre Bertrand Feuillet  
Chirurgien de Saintesfoy, luy  
donna quelque coup de guille  
pensant luy emporter vne taye,  
luy appliqua quelques poul-  
dres qui luy firēt perdre la veue  
moy arriuant apres cela, ie luy  
remis son œil dedans l'orbite,  
ayant

ayant premierement osté linflammation & tumeur, & lacheuay de guerir sans auoir l'œil difformé.

*Pterigion venant d'un vngula à l'œil*

**I**L y eust vne honneste femme de la ville de Belue laquelle ayant vn vngula a son œil droit, fut si rudement traittée par pouldres ou autres medicamēts àeres, & violants qu'il se fit vne grande inflammation, & par mesme moyen vn hypersarcome de la grosseur d'une noix, chancreus & puât, qui saignoit pour peu qu'on y touchast, mais l'ayant

yant saignée, & vniuersellemēt  
 purgée, ie la luy extirpay & cau-  
 terifay si legerement que pres-  
 que ie ny touchay point, a cause  
 de limportance & delicateſſe de  
 l'œil, ie lacheay de guerir tel-  
 lement qu'elle y voyoit du co-  
 ſté du grand cantus ſeulement.

*Playe tranſſerſant le pied toſt  
 guerie*

**I**L y auoit vn Eſcolier en ce-  
 ſte ville, lequel ſen allant aux  
 champs portant ſon eſpée ſous  
 laiſſelle, n'ayant point de bout  
 ſe plāta l'eſpée ſous le mallcole  
 externe, ſortant au milieu de la  
 plante du pied, qui fuſt guery  
 du tout

du tout dans trois iours par mō  
baume sans aucun accident.

*Arquebusade entre les deux  
yeux*

**A**Vx premiers troubles, & à  
lesmotion de Toloze, que  
les habitans se batoient avec  
ceux de la Religion, & que mō-  
sieur de Mōluc, & monfieur de  
Tarride y entrarent: il y eust vn  
grand esclandre pour ceux de la  
Religiō qui furent tuez en grād  
nōbre prins & pendus, ie trait-  
tay vn soldat de la ville qui re-  
çeut vne arquebusade entre les  
deux yeux sortant a la partie  
posterieure de la teste au des-  
sous locciput, sans toutesfois

offencer le cerueau ny les vertebres du col , & guerit.

*Playe d'un gros intestin.*

VN Gentil homme à Paris  
bleffé au ventre d'un coup  
d'espée qui luy coupoit ademy  
vn des gros intestins, par lequel  
sortoit l'excrement fecal , fust  
guery miraculeusement par vn  
moyen gentil , & digne de me-  
moire lequel ie descri ray affin  
qu'en cas de neçessité on sen  
puisse seruir , c'est qu'il faut a-  
uoir vn lopin de cane de la lon-  
gueur de trois doigts pour le  
plus, lequel faut rasp r finemēt  
& le rendre terue cōme papier,  
ce fait

cé fait le faut inuestir dās l'intestin d'un costé & d'autre, tellement que la playe soit au milieu du canon, & alors faut reioindre les labies de la playe de l'intestin & le lier d'un costé & d'autre afin que les labies demeurent ioinctes, & qu'il y aye un fillet qui sorte hors de la playe pour la panser soir & matin avec bon baume naturel, ou autre baume artificiel excellant duquel inhiberez vne meche de coton, & enueloperés l'intestī, & cela faut faire deux fois le iours il ne faut que le malade mange aucune viande solide ains se contante d'un hordeat & quelque pruneau cuit, & qu'il s'abstienne de boire,

que si tant est qu'il ne sen puisse passer boira fort peu de tizane. Il faut amplifier la playe du ventre pour retirer l'intestin, le saisir & remettre.

*Figure de la playe de l'intestin.*



Lors que la playe de l'intestin sera glutinée & consolidée, faut tout doucement briser la câne qui est dans l'intestin, car nature l'expellera par le dos faut aussi oster les filets, & remettre l'intestin dedâs oint de baume, & apres tascher à consolider la playe, le plus tost qu'il sera possible ce qui se fera commodement

ment par la cousture du peletier  
que Guidon propose pour les  
playes du ventre

*Autre playe à l'intestin*

**E**Ntre Moncla de Perigord  
& Bergerac, au village de  
Maillots, vn nepueu de M<sup>o</sup>sieur  
Durad de Peissonat, reçeut vne  
estocade despee quatre doits au  
dessoubs du nombril partie fe-  
nestre tranperçant le peritoine  
offençant vn des gros intestins  
duquel sortoit l'excrement fe-  
cal, lequel ie gueris dans peu  
de iours, par mon baume arti-  
ficiel fort excellent.

*Pepins de raisin sortis par vn  
cistone absces à l'aigüe*

*gallist*



**V**Ne Damoiselle de Perigort vefue, fen vint à Bergerac pour me monftrer vn absces qu'elle auoit à laigne fort enflamné, defia fuppuré prest à ouurir, ie croyois a la verité que ce fust vn bubon venerien lequel ie luy ouuris, & avec le pus fortit deux ou trois pepins de raifin, quoy qu'il y auoit long temps qu'elle nen auoit mangé voila comme nature est miraculeuse en ses faits.

*Playe de la vefsie guérie.*

**L**E Capitaine Choisy reçoit vne Arquebuzade au dessus du pubis transperçant la vefsie, faifât

faisant son issue bien pres du po-  
dex grouillât par la playe de de-  
uant , comme quand on donne  
vent a vne barrique , & pissoit  
par la playe derriere.

Vn soldat à Sainct Sibra tout  
couuert de boutons de verolle,  
reçeut vne estocade au dessus du  
pubis , sortant pres du dos : de  
mesme vn autre à Mandacon.  
tous deux mesmes cōfrontations  
& mesmes signes , ie les traittay  
& guerirent parfaictement.

*Maniaques gueris*

**I** Ay guery plusieurs maniac-  
ques par lapplication du cau-  
tere actuel ou potentiel sur la  
connexion de la commissure co-  
ronale avec la sagitale, & d'autres

que iay trepanez sur l'vn des parietaux. Les vns gueris les autres non. le leur fais prendre l'extraict d'Elebore noir, a la nouuelle Lune.

*Petites glandules fort douloureuses*

**I** Ay veu vne ieune femme du Bourg de Cours pres de Pilles, ayant vne glandule au dedans de la cuisse droite, de la grosseur d vne noisette mobile & sans inflammation, & vne femme du pont Saint namet, ayant vne glandule a la partie externe de la cuisse dextre, mobile & toutesfois vn peu rouge tant que contenoit la glandule, ayant toutes deux vne extreme dou-

douleur si tost qu'elles se com-  
māçoient à eschauffer dans le lit  
tellemēt qu'elles estoient con-  
traintes se leuer par la chābre  
& voyant que saignées, purga-  
tions, diētes, sommantations,  
emplastres ny vnguēs, ne pou-  
uoit sedē la douleur, qui estoit  
seulement en cestē petite glan-  
dule ie me resours de les ex-  
tirper & cauteriser, & furent  
bien tost gueries sans iamais  
plus sen ressentir.

Il y eust de mesme vn tailleur  
de Bourdeaux, qui auoit vne  
grande douleur au poulce de la  
main dextre contenant seule-  
ment vn coin de longle sans  
enflure ny inflammation la-

quelle douleur ne pouuant estre appaisée par tous les remedes de cesdeux femmes cy dessus mentionnées. Je me resouls dextirper ce coing d'ongle, & le cauteriser & fut bien tost guery, ayant auparavant employé plusieurs remedes à Bourdeaux, & ailleurs sans proffit.

*Gangrene à cause d'une*  
*incision*

**I**L y eust vn ieune homme fils de M<sup>rs</sup>ieur de la Deuise pres de Mompon auquel se fit vne grand defluxion sur vne iambe, & pour remedier à icelle on luy fit plusieurs incisions & scarifications, dont il y en eust qui auoit esté faictes transversalement  
par

par lesquelles on auoit osté la propre nourriture à la partie. le fus mandé & trouuay le pied & la moitié de la iambe en estiomené, dont ie dis aux parens qu'il falloit extrirper ce membre pour sauuer le corps, aquoy ils consentent & me prient de le faire, ce que i'executay & estant guerry vesquit dix ou douze ans.

*Vlcere de verole guery*

**V**Nc Damoiselle de Quercy, a laquelle s<sup>on</sup> mary auoit donné la verolle, apres auoir souffert plusieurs octions & diettes, luy restoit tousiours vn vlcere au palais de la bouche, lequel ie gueris dans douze ou quinze iours par le mercure diaphore-

tic , par laigle , & fleurs reuerberées

*Crane carié par Verole*

**I**Ay veu vn Gentil-homme d'Aginois le long de la Dordaigne, ayant eu la verole, souffert plusieurs onctions & fait plusieurs diettes , tousiours travaillé d'une cephalalgie en fin ayant recours a moy , ie luy ouuris plusieurs absces qu'il auoit en sa teste, & par la sonde ie luy trouuay la plus part du coronal & des dens cariee iusques au diploe , ie luy fis eleuation de la premiere table desdis os, & après fust guery par vne diette de Gaiac & son escorce que ie luy fis faire quinze ou vint iours.

*Dou-*

*Douleur hemicranée guérie.*

**A** Blois l'année de l'entreprin-  
ze d'Amboise, vn Gentil-  
homme tourmanté d'une mi-  
graine l'espace de dix ans, qui  
le prenoit tous les soirs estant  
au liect, & vn autre Gentil-hom-  
me nommé Monsieur de Lau-  
banie à Bergerac, a la suite du  
Roy de Nauarre, auant qu'il  
fust Roy de France, quoy qu'ils  
eussent estez plusieurs fois sai-  
gnez, purgez, & faict diettes  
nonobstant tout ce mal les  
poursuiuoit tousiours: s'adres-  
sant a moy ie les purgeay par  
pillule, & par louverture de la  
veyne temporale du costé de la  
douleur. Je vous puis asseurer



avec verité que auant bouscher la veine , ils disoient sentir la douleur sen aller comme qui leur eust osté le chapeau de dessus la teste. I'ay souuant en plusieurs lieux vsé de ce remede avec heureux succés, l'ayant veu pratiquer d'autres fois a vn medecin du Roy.

*Testudo atheromateux.*

**A** Saint Christophle pres Bergerac , y auoit vn ieune homme de laâge de vint ans ou enuirõ, lequel auoit porté en sa teste vn atherome si long temps qu'il estoit desia si eminent que les deux poings, comprenant sur le coronal tant que contient le poil au bord du front outre-

oultrepassant la commissure coronale comprenant vne partie des deux parietaux, laquelle tumeur l'importunoit fort sans douleur toutesfois, il me vint prier luy donner quelque remede, auquel ie fis respōce qu'il ny auoit remede que de l'ouurir, pour euacuer la matiere contenue. Ce que i'entreprins a sa priere, ayant faict l'ouuerture par incision cruciale, ie trouuay plus d'vne liure de <sup>bouillie</sup> bouillie a cause dequoy doit estre ainsi nommé & pour la similitude, tant de la substance contenue qu'aussi de la tumeur & la partie qui la contenoit ie lay nommé Atherome testudineux, ou Testudo atheromateux. Et

pour vous dire chose admirable  
i'y trouuay vn monceau de che-  
ueux blôds côme or quoy que  
le garçon auoit son poil fort  
noir ce monceau de cheueux  
de la grosseur d'un gros cordô,  
de la longueur d'une aulne, es-  
toit si bien replié, retroussé &  
entortillé, qu'un passementier  
ou brodeur ne sçauoit mieux  
agencer: ce que ie montray à  
plusieurs, & despuis ie lay per-  
du, ce que ie plains & regrette,  
c omme chose rare.

*Extraction de l'os femur.*

**D**Ans la ville de Bergerac.  
vn ieune homme nommé  
Iehan Cabanac âgé de quator-  
ze ans fust trauaillé d'une  
grande

grande deffluxiõ sur vne cuisse, laquelle en fin suppura, & d'autant que la matiere auoit long temps croupy dans ladite cuisse, elle corrompit, & altera non seulement les parties charneuses, qui sont les muscles lacerteux, ains aussi les parties solides, comme los femur, duquel i'emportay la plus part, excepté les apophyses dudit os, qui ne fust pas sans grád longueur, & plusieurs accidents, enfin fust parfaitement guery par vne diette, & regime de viure, le pore sarcoide tellement fortifié, qu'il couroit & voyageoit loin: & vesquit plus de quinze ans apres, sans se ressentir de son mal si ce n'est

quelque pesanteur qu'il sentoît au temps nebuleux, a cause de quoy ie le purgeois souuant.

*Polipe guery*

**E**stant à Gauaudum pour Madame de Caumont avec Monsieur Cassus medecin de Gourdon, se presenta à moy vn homme ayant vn polype à la narine dextre, laquelle narine la croissâce dudit polype auoit tellement enflé qu'elle estoit deux fois plus grosse que le naturel ne pouuant respirer par icelle, ie le saignay & purgeay, & apres luy incistay la narine avec vn cutellaire pour empescher que la playe ne se reprint, & par la ie luy exirpay le polype consumay les raci-

racines & enfin ie consoliday la playe de la narine & fust guery.

*Autre polipe guery.*

**L**An mil six cens six se presäta à moy vn ieune homme de Bourdeaux de laâge de vint deux a vint trois äs, ayät vn polype däs la narine dextre, s'estandant par l'os ethnoide descendant par le colatoire pendant plus bas que l'vuale, laquelle i'extirpay & arrachay par la narine & par le dedans de la bouche avec vn instrument que ie fis faire exores en forme de bec de grue plat, & dente l'é au bout par le dedans, estant rep'yé au bout l'ayant extirpé ie le lauois avec vin dissout avec ægyptiac

& luy passay vn cordon par la narine, descendant par les colatoires, & sortant dehors liay ce bout avec l'autre que i'auois mis par la narine, le dit cordo de soye ou cotton estoit imbu du vin susdit, & apres oit de ma poudre cathartique, ou avec l'vnguent de calcine de paracelse ayant du tout consumé la racine, ie desséchay l'ulcere & le cicatrizay avec l'antimoine, ou tutie preparée ou le pompholix meslé avec beurre frais, & guerit.

*Gangrene à lescrotum, Ver-  
me & Vantre inferieur.*

**I**E fus mandé pour aller voir  
vn Gentil-homme nommé  
Mōsieur de la Fillolie pardessus

Terrasson, lequel ie trouuay en tel estat que tout lescrotum estoit en gangrene, & partie des parastates, le cuir qui couure la verge, ensemble le cuir du vêtre inferieur, faisant de la urine par lescrotum iextirpay promptement l'vne piece apres l'autre de ce qui estoit gangrené, i'employay les decoctiōs vulneraires, l'unguent de calciné, & d'autant qu'il sentoit vne grand douleur à l'hypocondre droit la ou ie trouuay innondation laquelle ie ouuris par ou i'euacuay grand quantité de matiere foetide cendreuse, qui estoit la gangrene occulte cela luy donna vn grād allegemēt, & ayda fort a la guc-



riſon des autres parties, eſtât vn peu remis ie luy fis faire vne diette de vint iours, tellemēt qu'il guerit parfaictement & m' eſt ſouuant venu voir à ma maiſon & ſans louverture de l'hypocōdre il n'eut pas veſcu trois iours.

*Autre.*

**V**N nommé Monet Loche du bourg de la Madelaine lez Bergerac eut vne ſi grande deffluxion ſur les teſticules que le ſcrotum vint tout en gangrene & meſme la tunique interne nommée crematic ce que i'ex-tirpay entierement tellement qu'il ne reſta que les teſticules ſuſpēdus, & fuſt bien toſt guery.

*Rancontre de Monsieur de  
Bouillon.*

**M**onsieur le Duc de Bouillon sen venant de Turaine trouuer le Roy, pour lors de Nauarre, & depuis roy de France, rencontra pres de Molieres les gens de Monsieur de Limeil son Cousin, qui l'attendoient de guet a pens, au rencontre ils se batirent fort, & entre autres vn nommé du Perier de Limeil attaqua Monsieur de Bouillon qui estoit en pourpoint, sur vn simple courtaud, & de premier abord donna audit sieur de Bouillon vne estocade au dessus les deux clauicules, descendant ou pénétrant dans la poitrine dou

il cracha du sang, & des le lendemain sentit douleur de costé ayant les signes patonogmoniques de la pluresie ledit sieur de Bouillon dōna (en mesme tēps) vne estocade audit du Perier a la teste, partie dextre dans los parietal penetrant la premiere table du crane, rompant & enfonçant la seconde, dont il y eust vne esguille fort pointue qui donnoit sur la dure mere, mais d'autant que la Lune estoit au declin la-ditte esguille n'offença pas prōprement la dure mere mais en fin la Lune estant au plain lesguille perça les mēbrames iusques à la substance du cerueau a cause du diastole & sistole, ayant marché  
par

par ville & faiët bonne chere  
iusques au quarantiesme iour, au-  
quel temps tomba en cõnulsions  
epileptiques, escumant par la  
bouche sãs parler ny cognoistre.  
Alors Monsieur de Bouillon es-  
tant guery, Monsieur de Limeil  
mẽuoya querir pour voir du Pe-  
rier, lequel ie iugeay soudain à la  
mort, & trouuois fort estrange  
que les Chirurgiens qui lauoiet  
traitté (estant de Perigieux, &  
Sarlac gens de reputation,) ne  
l'auoiët trepané des le comman-  
cement. Estant doncques prié  
de le trepaner ie consents, a ce  
faire pour monstrier la cause de  
la mort l'ayant trepané, ie trou-  
uay dans le crane vn lopin de la

pointe de l'espée , & par mesme moyen tiray l'esquille plantée dans le cerueau , dou sortit grande quantité d'apostume, & desia commençoit à sortir par le nez, & mourut le lendemain au soir. Voila pourquoy ne faut iamaïs negligier ny mespriser les remedes ny operations requises, que si eiles ne succedent point à bien, pour le moins on n'en doit estre blasmé ayant faict le deuoir de l'art.

*Hydropisie pectorale.*

**V**Nc Damoiselle de Monens laquelle se tenoit avec Madame de la Force, tomba malade a Pau d'une fiebre continue, qui luy dura longuement , tousiours

siours avec grande difficulté de respirer, Madame l'emmena malade a la Force, la ou estant elle mourut. Je fus prié de l'ouurer, ce que ie fis, & luy trouuay ses poulmons baignans dans vne grand quantité de serosite, qui remplissoit toute la capacité du thorax, tant d'un costé que d'autre.

*Poulmon adherant aux costes.*

**I'**Ay ouuert plusieurs corps morts de pleuresie peripneumonie, épyeme, asthme ausquels iay trouué le poulmon adherant aux costes du costé qu'estoit la douleur.

*Fraçture des deux Parietaux  
par contusion.*

**L**E Roy de Nauarre estant à Bergerac lan, 1585. ses Suisses logez au Bourg de la Magdelaine, & mesme chez vn pauvre cordonnier, la ou on luy faisoit du desordre detraudant, & prodigalisant son bien, le pource homme sy voulant opposer & se faschât contre eux il y en eust vn qui print vne grosse busche du feu, & luy en donna de toute sa force sur la teste, dont il lassomma, lors monsieur Martel, & monsieur le Gendre Chirurgiens du Roy le vindrēt voir, auquel ne voulurent toucher le croyant mort, & le laisserent

rent sans le panser, ie le vins voir  
& soudain avec les doigts ie luy  
tiray presque tous les deux pa-  
rietaux, & cognoissant qu'il n'e-  
stoit pas mort combiẽ qu'il n'y  
auoit aucũ mouuement en tout  
son corps , sinon bien peu aux  
arteres , il guerit avec le temps  
mais il demeura plus de deux  
moys qu'on le nourrissoit de  
potages luy mettant dãs la bou-  
che sans ouurir les yeux , que  
quelquefois faisant ses excre-  
mens soubs luy sans le sentir ny  
parler. En fin dans cinq ou six  
moys on le leua , & estant for-  
tifié se traina par ville avec vn  
baston paralytique de la moitié  
du corps, parlant, & à vescu plus



78. *Observations*  
*de trente ans men diant.*

*Phrenesie apres l'accou-  
chement.*

**D**Ans la ville d'Eymet en  
Agenois, la femme de Blā-  
deyrac marchand ne s'estant  
point purgée de ses vuidanges  
apres son auortement atteinte  
d'une pluresie, vint en vne grād.  
phrenesie, a cause dequoy ie luy  
ouuris les deux saphenes, &  
luy ayant tiré quaptité de sang  
fust soudain guerrie.

*Glandes scrophuleuses sur  
le sternum.*

**V**N homme de monsieur de  
Lauauguion, se presanta à  
moy ayant vne grande tumeur  
sur le sternum declinant vers la  
partie.

partie fenestre près du tetin , & plus haut que le xiphoeide , avec certaine rougeur tendant au liuide , n'ayāt pas toutesfois grād douleur ayant les marques d'vn cancre occulte. Voyant doncques qu'apres la seignée , & purgation , ses tumeurs ne diminuoiēt point par refrenatifs , anodynse molliēs , ny resolutifs ains augmentoit tous les iours en douleur , inflammation & liuidité , ie luy fis vne incision du haut en bas , dou ien tiray plus d'vne douzaine de glandules , la plus part grosses cōme vne noix avec son escorce , & les autres moindres , entassées dans vne graisse ayśée à arracher , étant

au dedans de la matiere de steathomes , & atheromes le tout extirpé, l'ulcere deterge avec le precipite, & l'unguēt de calcine de Paracelse fut entierement guery, par le regime, purgation & diette.

*Tumeur à l'orifice de  
l'estomach.*

**M**onsieur de Chadoys de Saint-Bertomieu d'Agnoys , se plaignoit d'une grand douleur entre l'orifice de l'estomach & la regiō du foye. On le pansoit comme d'une obstruction de foye, venant de Nerac ie lallay voir & recognus que c'estoit vn absces bien profond lequel ie preparay par foments  
attra-

attractifs & emolliens , & par cataplasme ayant mesme vertu, dans trois iours ie lattiray au dehors, & en telle eminēce que par l'ouuerture que ie fis avec la lancette i'en tiray quantité d'apostume desia fort puante , & fut bien tost guery.

*Apostume dans le corps sans apparence guery.*

**L** An 1586. que le Roy de Nauarre estoit à Bergerac, il y auoit à la Force vn Ministre nommé Monsieur Lanin, natif de Bourdeaux, lequel auoit vne grand douleur à l'hypochôdre gauche, contenāt iusques à l'Ischion. Feu Monsieur Galtery Medecin de Bergerac le trait-

toit, & Monsieur Ioubert premier medecin du Roy l'alloit souuent voir a la priere de Monsieur de la Force lesquels quelque foys croyoient que c'estoit vne colique, quelque fois vne sciatique & furent vn fort long temps en ceste oppinion, aduint vn iour que Monsieur de la Force entrant au logis du Roy me trouua que i'en sortois. Il me pria d'aller voir ledit sieur de Lannin qui estoit a la Force fort mal ie l'allay voir le mesme iour, & l'ayant interrogé & palpé ie recogneus que c'estoit vn apostume dans le corps, le pauvre homme ne pouuant plus parler ny mouuoir que fort peu. Je luy  
appli-

applique fomentations & caraplasmes attractifs, emollients & suppurants, & dás deux ou trois iours, ores qu'il n'y eust tumeur ny inflammation, ie luy ouure le costé avec vn cautere punctuel ayant trois trauers doigts de pointe que ie fis forger sur le lieu allant trouuer bien auant la matiere, laquelle fust si puante qu'il falleust que la plus part de ceux qui estoient presens quittassent la chambre & guerit dans vn moys, & vesquit plus de dix ou douze ans apres.

*Mesme mal a Monsieur de  
Mangesy fils de Monsieur  
de la Force.*

**M**onsieur de Maugeſy fils  
de Monsieur de la Force  
venant malade d'une grãde dou-  
leur a l'hypochôdre gauche pres  
l'Ischion qu'il auoit porté long  
temps, ayant esté traicté d'icelle  
pour vne colique, ie le fus voir  
& l'ayant interrogé & palpé ie  
reconnus vn apolteme a la par-  
tie posterieure du femur, cinq  
ou six trauers de doigts plus bas  
que l'Ischion, & sous le muscle  
des nates appellé fessier & sans  
tumeur ny inflammation quel-  
conque, ie preparay & attiray la  
matiere par fomentations, lini-  
mens, cataplasmes iusques a tant  
que ie trouuay inondation de  
matiere fort profonde, ayant  
touſiours

touſiours vne grand fiebre continue, ie luy ouure ceſt abſces, duquel ſortit grande quantité de matiere fort puante, & fuſt du tout guery dans vn mois.

*D'un enſent nay ſans cul.*

**E**ſtant a Nerac, ie fuſ voir vn Enfant de Monsieur de Maſparraut nay ſans cul la ou nature n'auoit faiſt aucune marque, ie luy fis vne ouuerture au lieu q ie cognus eſtre conuenable, & luy preſſant le ventre luy fis ſortir a meſme inſtant l'excrement par l'ouuerture que i'auois faiſt & luy ordōnay vn onguēt pour vne tente qu'il falut tenir dedans pour deſſecher & cicatrifer l'incifiõ & deſpuis ſeſt bien porté.



*D'un coup de poignard dans  
la poitrine.*

**V**N nommé Pierre Tauer  
marchād nauif de la ville de  
Bergerac l'an 1616. reçeut vn  
coup de poignard dās la poictri-  
ne entre la troisiēme, & quatri-  
ēme coste partie fenestre pres  
l'emūctoire du cœur trois doigts  
de la papille du tetin entre ledit  
emunctoire penetrāt ledit coup  
au dedās du Thorax faisāt le sīg  
& enfin le pus par la bouche, &  
dans le quatorziēme iour fit le  
pus par le dos, lequel ie taictay  
& fust guery le quarātiēme iour.

*Tumeur à lanus ou podex.*

**A**V voyage de la Franche  
Côté vne lieue pres de Ly-  
on

on le faunier a la suite du Roy  
y eust vn Gentil-homme ma-  
lade d vne tumeur au podex en  
forme de hæmorrhoyde, grosse  
côme vne petite pomme noi-  
re, fort dolente. Monsieur du  
Laurens & moy le fusmes voir,  
auquel ie trouuay quelque mo-  
lesse, & inondation a ceste tu-  
meur parquoy iugeay qu'il y a-  
uoit quelque matiere contenue  
& pour la guerison ie proposay  
a Monsieur du Laurens qu'il la  
faloit ouurir, lequel fust de  
mesme aduis, ie fis dōc vne in-  
cision assez longue par laquelle  
i'euacuay vne matiere gluante,  
noire comme de l'ancre. Je de-  
tergeay l'ulcere, & la gueris sans  
quil.

qu'il y demeurast aucune fistule.

*D'une contusion sur la teste  
avec Epilepsie.*

**E**N ceste ville on me mena  
vn homme de l'aâge de tren-  
te ans ou plus, ayant esté batu  
de plusieurs contusions sur la  
teste sās aucune playe plus vne  
cōtusion sur la trachée artère sās  
aucune solution de continuité  
externe, toutesfois ie trouuois  
par l'attouchement deux anu-  
laires brisez. Il tomboit souuant  
en conuulsions epileptiques  
escumant par la bouche, moy  
croyant qu'il y eust fracture au  
crane ie luy fais incision sur la  
partie en laquelle il sentoit la  
dou-

douleur separant le pericrane  
d'auec le crane , la ou ne trou-  
uay nulle fracture, ie le saignay  
& purgeay par deux ou trois  
fois , en fin tous ces accidents  
cessarent , fust guery dans vn  
moys , & ne sen est reſſenty  
deſpuis.

*Arquebusade à l'Ischion.*

**M**Onſieur de Bouillon re-  
çeut vne arquebusade au  
fort de Nicole pres de Monbur,  
laquelle entra a la cuisse dextre  
rafflant l'ischion, dont la balle  
mena avec soy les esquilles en  
descendant à la cuisse, & s'arresta  
sous le muscle des nates apel-  
lé fessier, il se fist porter a Nerac  
dans le Chasteau , la ou moy,

Monfieur Orfaure, & Monfieur de la Gardelle , le traittasmes leſpace de trois ſepmaines dans lequel temps nous luy tiraſmes du buſle ou chamois des chauſſes que la balle auoit emporté dedans , & alors ſes grandes douleurs s'appaiſerent, & d'autant qu'il me falloir, retourner à Bergerac pour faire le payement de quelque bien que i'auois achepté, ie le ſuppliy me donner congé pour quelques iours luy promettant le reuenir voir. Ce qu'il me permist mais bien toſt apres il'en alla pour aſſiſſer Sarlat , & de la ( n'ayant peu entrer dans la ville à cauſe de l'empeschement qui aporta mon-

Monsieur de Limeil par le moyen des instructions qu'il donna aux habitans ) l'edit sieur de Bouillon sen alla trouuer Monsieur le Conestable son Oncle a Montpellier , la ou il demeura quinze ou seze moys , ayant tous les iours Medecins & Chirurgiens qui consultoient pour luy mais ils n'auancerent en rien sa santé , qui fust cause qu'il s'en reuint en Guyene, & passant à Bergerac il me dit que puis que ie lauois veu au commencement de sa maladie il falloit que ie l'acheuasse de guerir & ne voulut point que ie le visse que ne fussions a Turenne, la ou estant & l'ayant veu ie ran-

contray la balle bien loing de l'orifice de la playe avec ma sonde alors ie m'asseuray & luy promis que ie le guerirois avec l'ayde de Dieu. Le lendemain ie fis vne sonde double pour cognoistre combien il faillloit penetrer avec le rasoir pour rancontrer la balle & les os, & trouuay quil y auoit quatre grands doigts luy estant resolu de souffrir, ie me prepare pour le lendemain matin estant accompagné d'un Chirurgien de Saintes nommé Maistre Charles que mondit Sr. auoit prins en passant, ce qui fust diligemment executé auant dîner, tellement qu'en deux coups ie penetray iusques a la balle  
alors

alors mettant le doigt dedans  
i'emportay trois pieces dos & la  
bale En ce temps la le Roy  
manda ledit sieur de l'aller trou-  
uer ce qu'il fit avec cinq cēs che-  
uaux & six mil arquebuziers,  
& fallut que ie le suiuisse, mais  
dās trois sepmaines, en marchāt  
il fut du tout guery, & trouua-  
mes le Roy a Saint Denis qui  
luy vint au deuant, & l'embrassa  
& baïsa fort long temps, estant  
ayse de le voir en santé.

*Ulceres au palais guerie.*

**A** Pres les premiers troubles,  
estant a Limeil pour Mon-  
sieur de Floyrac, Monsieur de la  
Rocque meyrals me vint trou-  
uer pour me mener voir Mada-



me sa femme, yñuë de la maison de Fumel fort honnorable, & sage dame alaquelle estoit suruenu vne defluction au palais laquelle suppura, & estant ouuerte on luy fist plusieurs gargarismes astringents & fort dessechans, lesquels on auoit si long temps continué, que lors que i'y arri-uay, ie trouuay les bords de lulcere reuestus de cuir, durs & calleux, l'os du palais descou-vert ayant esté traitté par des doctes medecins de Sarlat asçauoir Messieurs de Meynier & Tournon, & vn chirurgien nō-mé Sordes lesquels m'ayant discouru de leurs remedes, ie leur dis qu'il ne sçauoiēt iamais guer-  
rir

rir c'est vlcere quil ne fut renou-  
uellé & mesmememēt les bords  
calleux, lesquels remirēt le tout  
entre mes mains & me prierent  
d'ordonner, & de faire ce qui me  
sembleroit estre necessaire alors  
avec vn peu de cotton trempé  
en eau regale, ou eau fort au  
bout d'une sonde, ie luy touchay  
tout l'ulcere, & principalement  
les bords, deux iours cōsecutifs,  
& ayant renouellé ledit vlcere  
& rendu vermeil, ie luy fis vne  
opiate de miel rosat avec la pou-  
dre de mirrhē, dans laquelle ie  
trempois vn plumaceau de cot-  
ton & le mettois dans l'ulcere  
soir & matin, & guerit entiere-  
ment dans cinq ou six iours.

*Vne fille née sans vulue.*

**L**A femme d'un cordonnier de Bergerac nommé Peyre Merlie, dit de la Pelongue s'accoucha d'une fille sans vulue, pissant par le dos, à laquelle ie fis vne incision, selon le lieu destiné de nature, & vesquit environ un mois seulement.

*D'une tumeur cancruse.*

**F**EU M<sup>r</sup> sieur des Aygues Procureur General en la Cour de Parlement de Bourdeaux, me montra son fils a presant aussi Procureur General en la dite Cour, qui auoit au costé du nez vne petite tumeur de la grosseur d'une grosse febue, rouge tirant sur la plombe, dolante quel-

quelque fois, laquelle il auoit  
porté quelques années, & luy  
auoit on appliqué plusieurs re-  
medes familiers, ne l'osant irriter  
disant que c'estoit vn Noli me-  
tangere, dequoy son bisayeul en  
estoit mort, qui les faisoit crain-  
dre, & moy y estant appelé &  
ayāt cōferé avec eux trouuay e-  
strāge dequoy ils faisoient si grād  
difficulté, & en leur presāce ie le  
gueris dans peu de iours, avec  
ma poudre cathetique avec la-  
quelle chacun iour i'en faisois  
tomber vne crouste sans qu'il y  
parut playe ny vlcere, durant le-  
quel temps son pere mourut, &  
salut qu'il s'en allast vers le Roy  
pour sauuer l'office & guerit en  
E

chemin avec des emplastres que ie luy baillay.

*Verrue guerie sans incision*

**E**stant a Bourdeaux pour Mr. Guissinieres marié avec vne niepce de Monsieur des Aigues Procureur General, i'alloy souuēt voir Monsieur de Monts President aux enquestes, & Madamoyselle sa femme qui auoit au costé du nez vne verrue grosse comme vne febue, sans douleur toutesfois, de mesme couleur que le reste du visage, & d'autāt que cela luy desplaisoit elle me dit qu'elle desireroit bien que ie luy peusse oster cela sans dommage, ce que ie luy promis & dans dix ou douze iours ie la consumay

sans

sans douleur ny vlcere, quoy que  
chacun iour i'en faisois tomber  
vne escarte.

*Iliacque passion.*

**V**Ne fille de Monsieur de  
Sauliere Conseiller a Peri-  
gueux vint malade a Bergerac  
d'une iliacque passion, laquelle  
languit long temps, son habitu-  
de melancolicque vomissant la  
matiere fecale tous les iours  
deux ou trois fois: estant morte,  
le medecin qui l'auoit traittee,  
croyant n'auoir pas bien cogneu  
sa maladie, quoy qu'il leust iu-  
gee iliacque passion, on map-  
pella pour l'ouurir, commençant  
par l'Epigastre la ou nous deb-  
uions recognoistre la cause. Je

luy trouuay donc l'Intestin cæcū solide en masse de chair noirastre qui est la couleur de l'humeur melācolique de laquelle s'ōt ēgēdrez les schirres, ne trouuāt dās ladite masse q'vne fort petite voye a mettre vn bout d'esguillette qui estoit eau du vomissement de la matiere fecale, nature ne pouuant vider par bas.

*Phrenesie, douleur de ventre  
a cause des vers.*

**I**'Ay veu plusieurs enfās phrenetiques, grinçans les dents s'escriant souuāt pour la douleur pungitiue qu'ils sentoient au ventre & croyant que les vers en fussent la cause, ie leur baillois clistere doux le lait ou decoction de

de fruiçts & fleurs cordiales avec  
succe, miel violat & iaunc d'œuf  
& le lendemain vne infusion de  
rhubarbe , de sementine avec  
l'eau de pourpier , adioustant a  
l'expression le syrop de fleurs de  
pesches, qui leur faisoit faire quā-  
tité de vers, & quelque fois ie  
leur faisois vn cataplasme de fa-  
rine de lupins avec la liqueur du  
fiel de taureau ou de bœuf ou  
aũtres, & leur appliquoy sur le  
nombril & faisoit vne operation  
admirable euacuant quātité de  
vers, ce que i'ay veu & pratiqué  
non seulement aux estrangers,  
mais a mes propres enfans.

*Hémorragie par vn pore du  
cuir sans playe.*



**L'**Ay veu vne femme de la ville de Bergerac qui gouvernoit le four du Capitaine la Palanque laquelle ayant passé les cinquante ans, ne se purgeant plus de ses menstrues, souuent (cōme vne fois le mois) luy suruenoit vn flux de sang au dessoubs du metaphrene, & enuiron la region du foye, par vn pore du cuir, par ou elle perdoit plus de demy liure de sang: pour a quoy remedier iela seignay du brasdroit de la vene hepaticque, & luy commanday vn regime de viure abstinent, refrigerant, & dessechāt, & luy ostay le vin, & par ce moyen son flux cessa, fut guerie & vesquit plus de dix ans, sans ce ressentir.

ressentir plus de cela.

*Homme ne pissant point.*

**I**Ay veu vn gētilhōme de mou-  
Isac ē Perigord nōmé Mōsieur  
de Bosfredō aâgé de soixāte ās le-  
quel demeura lōg tēps sās, pisser  
routesfois sans douleur, durant  
lequel tēps son vētre estoit si la-  
che qu'il sēbloit auoir vne liēte-  
rie, a quoy ie remediay par le re-  
gime de viure dessechant & cor-  
roborant, & le purgeay par reu-  
barbe en infusion & en substan-  
ce avec les mirabolans, & fut  
guery & remis é sō premier estat.

*Vne tumeur de la grosseur d'une  
grosse figue dans la bouche.*

**M**onsieur Muguet ires do-  
cte Medecin demeurant  
à Perigucux & moy fusmes ap-  
pellez pour voir Madame de  
Longua de Larmandie, laquelle  
auoit vn ficus dans la bouche  
sur la gèciue superieure gauche  
enuiroñ les dents molaires la-  
quelle tumeur estoit desia vlce-  
rée, chancreuse, liuide, foetide &  
saignoit pour peu qu'o la tou-  
chast; auquel lieu est malaisé  
d'appliquer les remedes, veu  
dōcques que cela ne se pouuoit  
guerir sans extirpatiō nous fus-  
mes d'aduis de lesteindre, & ex-  
tirper par vne ligature, par le-  
quel moyen, cōme ce ficus per-  
doit & estoit priué de sa nour-  
riture

riture, tât plus il se mortiffoit,  
& estoit puant peu à peu ie res-  
ferrois la ligature l'espace de  
trois iours , en fin voyant que  
ladite Dame auoit beaucoup  
dincômodité à cause de la pu-  
anteur , qui luy cauſoit vne fa-  
stidiosité , & luy faisoit abhor-  
rer les viandes i'acheuay de l'é-  
puter, dou il sortit grand quan-  
tité de sang, lequel ie suprimay  
par vn vinaigre rosat tres  
fort duquel ie luy faisois lauer &  
tenir dans la bouche, & par ce  
moyen le sang fut restrainct, &  
après ie gueris l'ulcere layât tou-  
ché vne seule fois avec eau re-  
gale, & après avec vn gargarisme  
faict d'orge, plantain, escorce de

grenade, & roses bouillies avec vin rouge.

*Vlcere sinueux a la cuisse avec  
hemorragie.*

**V**N Gentil-homme de Perigord pres de Grignauls nommé Monsieur de Chaumôt eust vne defluction a vne cuisse laquelle suppura & fut ouuerte par quelque Barbiers de village, or pour auoir ignoré les remedes vniuersels ou generaulx (asauoir le regime, seignée, & purgation) fut pésé par vnguets putreffectifs sans iamais deterger l'vlcere, l'hummeur se randit si acre qu'elle corroda vne vene d'ou sortoit quātité de sang tous les iours, alors fut contrainct me  
mander

mander, la ou estant salut auoir esgard au plus vrgent & mettre peyne a restraindre le sang, & pource faire ie commençay par vn clistere emoliât rafreschissant, & soudain luy tirant quantité de sang de la basilique du costé de l'ulcere, & d'autant que la veine estoit si profonde que ie ne la pouuois voir ny toucher, ie luy faisois iniection de vinaigre rosat lequel ie laissois croupir dedans l'ulcere, en fin le sãg fut restraict par ce remede, & par regime de viure, diette, potions, & iniections vulneraires: fut entierement guerry, & vesquit plus de dix ans.

*Vn corps mort etique,*

*& la cause.*

**E**N la ville de Bergerac vn Bourgeois , & honorable marchand nommé Pierre Eyma dit Frigiguel , en son viuant se plaignoit d'une douleur d'estomach , & vomissoit sa viande avant qu'il eust prins le tiers de son repas, à cause dequoy il auoit eu l'aduis de plusieurs doctes Medecins de Paris , Bourdeaux, Toloze, Perigueux, Sarlac, Bergerac , tous lesquels Medecins auoient esté trompez en la connoissance de ceste maladie, aucuns disoiēt que c'estoit opilation de foye , quelquefois par rancontre trouuant quelque tumeur & dureté au costé gauche disoient que c'estoit vne opilation

tion de ratte. Et vesquit si long  
temps en ceste langueur que s<sup>on</sup>  
corps fut tellement extenué que  
le cuir n'estoit pas suffisant pour  
couvrir les os, en fin il mourut  
en sa maison. Alors considerant  
& croyant que sa maladie n'a-  
uoit iamais esté bien cogneue,  
ie fis prendre le corps à Maistre  
Claude Deuille Apotiquaire  
qui me le porta dans vne cham-  
bre laquelle ie fermay par derri-  
ere, & presque outre le gré des  
parens i'ouüris ce corps auquel  
ie trouuay des choses monstreu-  
ses dignes de memoire ce que e  
ne voudrois n'auoir veu pour  
beaucoup. Et premieremēt pour  
descrire la cause de son vomisse-



mēt ordinaire, c'estoit vn schir-  
re qu'il auoit au vētricule en v-  
ne masse de chair de la couleur  
de la ratte, laquelle aussi estoit  
beaucoup plūs grosse que sō na-  
turel, & les veines qui sortoient  
d'icelle pour ébraffer l'estomach  
donner l'apetit & succer le sang  
noir, la ratte ne faisant plus c'est  
office de l attirer, nature l'ēplo-  
ya à nourrir le ventricule, telle-  
ment qu'au lieu que ceste par-  
tie doit estre membraneuse, se  
randit toute charneuse, tel-  
lemēt que toute sa capacité n'e-  
stoit pas pour cōtenir deux œuf  
qui estoit cause qu'il vomissoit  
aussi tost qu'il estoit plein, & ne  
pouuant vomir le tout, il en re-  
stait

estoit tousiours quelque portion, laquelle vint en fin a se corrompre & gāgrena le ventricule, lequel estant pourry & persé, le boire & le manger s'espandit par tout le ventre & mourut en cela.

Plus luy trouuay à la mēbrane nommée omentum ou epiploon, qui nage & couure les intestis deux ou trois tumeurs charneuses comme le poing, glāduleuses qui estoient cause que les Medecins iugeoiēt mal pour la nomination desdittes tumeurs & duretez.

*La gangrene commençant par  
les doigts du pied.*

**L**A gangrene cōmançant par le doigt du pied, si le malade

est vieux ne reçoit point guerisō  
comme i'ay veu à vne lieue de  
Blois, à vn homme de laâge de  
soixante ans, a qui la gangrene  
suruint par defluxion.

*L'œil percé d'un couteau ouery.*

**P**Res de Laufun la fille d'un  
Gentil hōme nommé Mon-  
sieur de la Forest, de laâge de  
trois ou quatre ans. se perça vn  
œil d vn couteau dās la coraée  
dou se la gucris & ne perdit pōit  
la veue & a esté mariée d'espuis.

*Chalazium ou grandc qui vient  
aux palpebres des yeux.*

**I**Ay traité plusieurs qui a-  
uoient vne telle maladie qui a  
accoustumé de venir aux pal-  
pebres des yeux laquelle fait

vne

vn̄e petite tumeur qui paroist  
exterieurement aux palpebres  
dessus ou dessous, & quoy que  
Paulus Ægineta cōmāde (pour  
la curation,) faire vn̄e incision  
externe transuersant les fibres  
ie fay autrement, car ie ranuer-  
se la palpebre, alors ie voy le  
Chalasion comme vn grain de  
grosse lequel ie transperce avec  
la lancette, & emporte la piece,  
& lors ie la touche legerement  
auec du cotton, au bout de l'es-  
proue trempé dans eau secōde  
la ou ie passe si promptement  
q'vn vent & soudain, la laue &  
relaue avec eau fresche, & apres  
ie n'y fais autre chose que le  
collyre faict de trociques albu

rhafis & tuthie , preparée dissous avec eau rose duquel faut appliquer soir & matin, & d'autant que bien souuent il y suruient quelque peu d'inflammation ie leur tire vn peu de sang de la cephalique & leur baille vne prinse de pillules aurées & sine quibus & avec le regime de viure guerissent bien tost: ien ay traité a Bourdeaux chez Monsieur Brier, le pere de son Gendre en sa presence. Plus le iuge de Lausun qu'on nommoit Monsieur Colomb, lequel en auoit aux deux palpebres & n'y mis la main qu'vne fois. Ien ay traité plusieurs autres & les ay gueris.

*Vomissement des petits enfans.*

**I** Ay veu plusieurs petits enfans  
voire mesme des hommes de  
trante ans ou plus, trauailles de  
nausée qui est appetit de vomir,  
d'autres vomissoiēt de faict tout  
ce qu'ils beuuoiet & mangeoiēt  
ayant anorexie qui est abhorre-  
ment des viandes ou faute d'ap-  
petit: lesquels ont esté tous gue-  
ris par les purgatifs accōpaignes  
de l'antidot des vers commē çant  
par les clisteres doux soit de lait  
de fructs cordiaux avec les  
fleurs cordiales y dissoluant le  
succe, miel, violat, iaune d'œufs  
sans huile. Et le lendemain, leur  
donnois vne infusion de rheu-  
barbe, & semen contra vermes,  
& dissoluois l'expression le si-

rop de floribus persicorum & lelectuaire de citro solutx ayant esgard aux aages, laquelle potiõ ie reiterois selon lexigence ou perseuerâce du mal. Et quelque fois ie leur appliquois sur le nõ-bril & ventre inferieur vn cataplaine fuit de raspeure de racine de brionia meslé avec miel commun, fiel de taureau, & farine de lupins sans coction, lequel remede exterieur ayde fort, & augmente la vertu & force de la potion susdicte.

*L'vrine reiectée par le dos*

**Q**uelques fois il se fuit des obstructions aux reins, aux veines emulgentes, aux vretères a cause de certain flegme, ou

ou mesme la serosité attirée par  
lesdictes veines emulgentes, les-  
que les par la chaleur des reins &  
du foye s'espaississent se rendent  
gluens, tellement que l'yrine ne  
pouuant passer par les vreteres,  
nature cherche d'autres lieux co-  
uenables (d'autāt que tout nostre  
corps est transpirable) lequel  
faict transpercer dās les intestins  
pour s'en descharger, n'ayant a  
ce deffaut partie plus propre  
pour ce faire.

*Ulceres au menton guerie par lar-  
rachement d'une dent.*

**O**N voit souuent les deflu-  
xions sur les dens estre si  
grandes, que non seulement el-  
les tumiffient la ioue ains font



Vn absces a la genciue que les Grecs appellēt epulide, laquelle descendant au menton sur la maschoire inferieure y cropifant corrompt & altere l'os, tellement que l'ulcere à d'aucuns est guery par larrachement de la dent, mais quand il y a carie l'ulcere ne peut guerir que la carie ne soit ostée, comme aduint à Madame la Procureuse Generale des Aigues à laquelle falust non seulement arracher la dent mais aussi oster la carie, & l'ulcere fut guery bien tost apres.

*Artere coupé, l'hemorragie guerie par ligature.*

**I** Ay traité & arresté plusieurs hemorragies des venes & arteres

arteres rompus ou coupez par la seule ligature desdits vaisseaux, ne pouuant le retraindre par remedes astringēts n'y cauterer, & ne m'amusois à descrire la vene ou artere par l'incision du cuir estant empesché par le grand flux de sang, ains avec mon aiguille courbe perçois le cuir, & passât par dessous le vaisseau liois tout ensemble bien serré, & ne m'amusois point à ce que Mōsieur Paré en dit, car ie croyois qu'il eust esté biē empesché d'aller prandre le vaisseau avec le bec de corbin veu les grādes hemoragies que iay veu d'autres fois qui me sautoient au visage, & m'empeschoient de re-

cognoistre , n'y comprendre le vaisseau pour le lier.

*Pluresie purgée par les urines.*

**F**Eu Monsieur de Floyrac Frere de Monsieur de Limeil fut malade d'une grand pluresie , lequel estoit si irregulier qu'il ne vouloit prendre n'y souffrir aucun remede propre excepté quelque clistere , & liniments toutesfois nature fut si forte & prouide en luy qu'elle se purgea par les urines reiectant le pus par icelles.

*Difficulté de respirer cause  
la mort.*

**E**Ymon Deymier de Bergerac bõ soldat luy survint une schinancie avec grand inflammation ayant esté tout le iour en ceste

ceste peine sans secours, fust mort  
dans vingt & quatre heures.

*Tumeur suppurée par le seul  
Teriaque.*

**I**Ay traité plusieurs absces les-  
quels ont esté suppurés par la  
seule application du teriaque en  
forme d'emplastre.

*Cheute a la rēverse cause diabetes  
qui est fleur d'urine.*

**I**'Ay eu en main Madamoïſelle  
le Sainct Martin de Gardōne  
pres Bergerac laquelle estant  
cheute de cheual a la rēverse sur  
l'os sacrū, & sur la derniere ver-  
tebre de l'espine que nous ap-  
pellōs os caudæ de laquelle sort  
vn nerf qui a vertu de reſtraindre  
la veſcie, lequel nerf estant es-

F

caché & contus la vefcie ne pou-  
voit retenir l'vrine, en fin tust  
guerie par baings, & liniments  
que ie luy ordonay avec vne  
petite diette, & regime de viure.

*Vomissement noir comme ancre,*

**E** Stant a Fouguerolles ches  
Monsieur de Sainct Aulaye  
vne siene fille se voulant mettre  
a table pour souper, ie la vis pal-  
lir & cogneus qu'elle se trouuoit  
mal, soudain elle vomit plus  
d'une pinte d'humeur si noire  
que de l'ancre, ce soir mesme ie  
luy fis donner vn clistere par le-  
quel fist des deiections de mes-  
me couleur, le lendemain ie la  
purgeay dont la premiere & se-  
conde selle estoient de mesme

cou-

couleur, mais a la troisieme ie  
recogneus la tainture de mon  
medientcam-al<sup>ors</sup> iugeay qu'el-  
le n'en mourroit point.

*Par l'odeur d'un medicament  
estre purgé.*

**I**L y auoit a Perigueux vn hō-  
me d'Esglise qu'on nommoit  
Monsieur le Châtre, lequel estat  
mal disposé se faisoit ordonner  
medicamēts purgatifs & lors qu'ō  
dissoluoit les solutifs il alloit fleu-  
rer & prendre l'odeur, & faisoit  
autant d'operation que sil l'eust  
prinse par la bouche.

*Vn monstre né.*

**A**V village D'ayrenuille pres  
d'Issigeac nasquit vn enfant  
masle ayant deux testes my par-

ties, toutesfois jointes par les deux visages, ayant quatre bras, deux corps séparés depuis les deux emûctaires du cœur, quatre fesses, & quatre iambes, vn nombril seulement sortant des deux nombrils.

*Sang tiré du bras, fetide.*

**P**Res du Monteil vn fils de Maître Mathieu Ramond malade d'une fiebure continue fust saigné par moy, dont le sang estoit fort corrompu & puant en sortant, comme si c'eust esté du pus ayât croupy long temps en quelque absces.

*Difficulté d'urine.*

**L**E Roy Henry de Bourbon  
Roy de France & de Navar-

re estant en Normandie a cinq ou six lieux de Rouan Monsieur de Carrouge Gouverneur de la dicte ville de Rouā, vint trouuer sa Maïesté, comme tres fidelle seruiteur, ayant esté chassé de la dicte ville par ses deux fils, qui estoient de la ligue, & durant ce tēps la ledict sieur de Carrouge vint malade d'une douleur de reins & difficulté d'vrine, lequel ie fus voit & luy ayant mis mon Argalié dās la vescie, iamais n'e fortit vne seule goutte d'vrine, ce que voyant ledict sieur s'en va a la maisō de Carrouge a vne lieue de Rouan, la ou estant il appela le premier medecin de la feu Royne mere, & le principal mede-



cin de Rouan & moy, pour consulter sa maladie, & iugeames que puis qu'il ne sortoit point d'vrine dans son receptacle (qui est la vescie) cela aduenoit & estoit causé par vne imbecilité des reins, ou par quelque obstruction aux venes emulgentes, & aux vreteres ce qu'estant cōclu & arreté entre nous, & ordonné les remedes propres, ie m'en retournay trouuer le Roy, & en chemin cuiday estre prins par ceux de la ligue qui me galoparent vne grande lieue mais il y auoit vn ruisseau entre eux & moy qui me donna moyen d'euader & estant ala veue de nostre camp ils s'en retournerent & ledict  
sieur

ſieur de Carrouge mourut dans ſept ou huit iours de la, lequel fut ouuert & me fut rapporté que la cauſe de ce deffault eſtoit (comme il fut recogneu) limbecilité du rognō qui ne pouuoit faire ſon action n'y les veines emulgentes par ce moyen ne pouuoient attirer la ſerofité pour l'enuoyer dans la veſcie, par la voye des vretères, & tout cela prouenoit de l'imbecilité & intemperie deſdicts reins, laquelle intemperie a accoutumé d'eſtre froide, par laquelle principalement toutes ſes vertus naturelles ſont depraüées, & corrompues.

*D'une estocade d'espee au deffous  
du muscle dethoide montant le  
long du bras entrant dans  
la poutrine.*

**V**N Bayle de Monbazilhac  
appellé Casse vertat receut  
vn coup despee au bras gauche  
au deffous du muscle biceps  
montant & coulant le long de  
l'os dans l'emunctoire du cœur,  
sans sortir dehors, entrant dans  
la capacité du thorax, transperçant  
le poulmon, sortant au deffous  
l'omoplate dextre, sortant dehors  
entre la troisieme & quatrieme  
coste, crachant le sang a mesme  
instant qu'il print le coup, & en-  
fin le pus: dont il en est guery il  
y a trente ans.

M. G. Loyseau Medecin &  
Chirurgien. Au Lecteur

**I**E pourrois escrire plusieurs autres choses, lesquelles i'obmets tant pource que ce seroit dire chose, que possible d'autres peuvent auoir fait & dit mesme chose si biẽ que moy. Et n'est pas impossible que d'autres n'ayent fait, dict, & inuenté pareille chose que moy, suppliant les Lecteurs de m'excuser si i'ay escrit ce petit traitté en langue Françoise, & diray la raison, que plusieurs qui ne sont pas Latins desireront voir ces histoires n'estans Medecins ny Chirurgiens, & d'autres Chirurgiens qui ne sont pas Latins, lesques lisans les belles

operations par moy faiçtes pour-  
ront prendre courage de faire com-  
me moy , & mieux s'ils peuvent,  
sachant bien que Dieu les peut be-  
nir si bien que a moy & plusieurs  
qui auront plus de capacité pour-  
ront voir mon petit .liure que iay  
faict des maladies internes, & ex-  
ternes , avec leurs Histoires veri-  
tables, rares & dignes de memoir-  
e , suppliant tous les Lecteurs de  
mexcuser, de le prendre à gré , &  
de si bon cœur que ie leur offre.



# FAUTES A CORRIGER

## en l'Epure au Roy.

**F**euillet 2. page 1. ligne 6. iusqu'ace que ma  
f. 3. pag. 1. l. 5. singuliere vertu l. 7 pour ma  
memoire l. 11. lequel en son viuant l. 18. leurs  
maladies pag. 2. l. 2. mon absence.

### Au Sommaire

Feuillet 1. pag. 2. l. 6. la trachée artère l. 18.  
perles f. 2. pag. 1. l. 18. d'intestin l. 4. glandules  
f. 4. pag. 2. l. 1. & 2. diabetes.

### Au liure.

**P**age 21. ligne 8. bourrelet p. 26. l. 16. tumifia  
pag. 30. l. 2. pourroient pag. 31. l. 1. la tra-  
chée artère pag. 42. l. 13. & 14. vessie pag. 45. l.  
4. sentans p. 63. l. 13. bouillie pag. 90. l. 12  
assieger pag. 108. l. 4. de-Frigiguel pag. 116. l. 2.  
citro solut. pag. 123. l. 3. medicament l. 13.  
& faisoit.